

# Jondi Jesu'walaŋ mede hebinij yobihikuk Yodakale Mede

Kayonbop hekidi Jesu Kilisto adi Wapumhik undun nadisukilitigin kan widihi tubukadaka tagin nai unanin pepa i youkin. Pepa yendi kayonbop nadisukilitihik tubukilitiune malabumuŋ wapuhidi mu yehitubugweheyedok yenin kilitiguk.

Pepa yendok ginen nemek kougon mintawaak wendok yoyout mede fee hakiin. Nai unanin kayonbop hatigin adi yoyout mede u kedem binek nadidakalegin, inon kayonbop mu tinan kaulehi hatigin heki adi tuwot mu nadidakalegin. Yoyout mede wendinin mebi adi indin. Jesu Kilisto adi Wapum, doktinan Bepandi adi kohon folon memik hogohogok yapmeune yehiyalimonogofowaak. En Sadan maan undugon yalitifowaak. Jesu Kilistodi kwanainin tubudapmawaak, kan nai unanin metam nediyan fafane tinan yali nadisukilitihik mu gweheyewaak, adi yadi tuwahik yembaak. Bepandi nemenemek hogohogok kobuli tubumintadapmawaak, nai unanin metam u Bepan gut malabumuŋnit mokit hatineen.

## *Mede Yodakale*

<sup>1</sup> Jesu Kilisto'walaŋ mede hebinij yobihikuk won adi nai muninin hinek nemek mintadok yonit u tipilapilaye-meniye yenindakale titindok Bepandi Jesu nimbihikuk. Kan adibo

anelonin ninikulune tipilapilaye-menin Jon nin-didime tuguk. <sup>2</sup> Kan nubo Bepan'wala mede en Jesu Kilisto'wala yodakale mede kanadi tugutdi nadikwambundan yobihila youkut. <sup>3</sup> Kan kigili mede i kunayembaak nebe, be mede youkudip tinj u nadija nadidahija takalineen adi Bepandi kahan tiyembune kulemanjon hatineen. Biyagon kuyon, nai aganj muninjon hinek tilak.

### *Yokahan dut Youtumba Mede*

<sup>4</sup> Nu Jondi Esiya kwetnen Jesu'wala Kayonbop 7 hatiin hiditok pepa i youhamulat. Hatigukdi hatilak tija kotigon baak, adi'walaanin en munabuli 7 mapme pop namanda folon hatiin adi'walaanin, <sup>5</sup> en Jesu Kilisto'walaanin silon tobogon en kulemadi hidut youdihinit hatuwaak. Biyagon hinek, adigon Bepan'wala mede hogohogok yobune kwambundadapmalak. Tija adigon kumun ginenin tububihila kaikaan pilakuk. Tija undugon mapme kwetkwet hatiin'wala Wapumhik en Lolonit hatilak. Adi welesilon tinimiya nangatnjindi kadakanin ginenin nihikagiyali <sup>6</sup> Bepan'wala Hatihati Unjonin dinin Kayonbop nihitubu-mintaan, Beu Bepan dinin Silon Hemin dinin kwanaim hatidok nininguk. Biyagon kuyon, adi'wala wougigit hautanit en sanin wapum hatakdi haliwoon halaak fafanin. U biyagon.

<sup>7</sup> Abe nadiin! Adi mulukwan ginen baak kan meenin hogohogok dauhikdi kaneen. En bohondi yout tigin hekidi maan kaneen. Meenin bop hogohogok kwetkwet hatiin adi aditok tija

kobulabulaye tineen. Mede yon adi biyagon hinek. <sup>8</sup> “Nu nagon timen hatigutdi mindan hatibaat.” Wapum Bepan, Sanjin Molomdi undun yolak, adi hatigukdi hatilak. Biyagon hinek, adi yadi nemenemek tububihila tubumintagukdi kaugon kotigon baak.

*Jon adi dawi tombune Bepan’walañ kudi hebiniñ kaguk*

<sup>9</sup> Nu nohik Jon. Indi Bepan’walañ hati-hati ungoniñ kahileen nongon hatiyam, tiña Jesu’walañ kayonbop doktiña mik-kwadi ginen folofigita wanañ nadinila gicine tiña hatiyam. Ingon on, nu Bepan’walañ mede, en Jesu wou yohautagut doktiña kwet kambangit Patmos unon napmeune itougut.\* <sup>10</sup> Ala Wapum’walañ nainiñ (Sonda) niñ folon Ungoniñ Munabulidi sanjiniñnit hinek fotokinambune ila nadiwene sigine folon hinek aignon mede wapum bai gigilit nabugon mintaune <sup>11</sup> mede indin nadigut, “Nemek yabulañ u pepa ginen youla Kayonbop 7 yendok boiyembune uneen. Efeso en Simena en Pegamam en Tayataila en Sadis en Filadelfiya en Leodisiya.”

*Jondi Jesu’walañ folonamandap kaguk*

<sup>12</sup> Kañ nu me mede naniñguk adi kawit yona fambekenegut. Fambekeneen kamañ boidok kwehik 7, goldi tigin, yabugut. <sup>13</sup> En kamañ boidok kwehik lekingon folon niñ yalune kagut adi Me Kobumun nabugon. Dahidahiñiñ

---

\* **1:9:** Jondi mede yobihit i youkuk adi Patmos agañ bikabuña kwet wapumnen hatina youkuk.

kweheyenij dahiune foon kayon kifuladapman tuguk. En siyo folon kiyegelep goldi tigin youkiliguk. <sup>14</sup> Mebi en mebi hapmun adi fafau niyaniyan. En dawiyat adi kudupmebem nabugon. <sup>15</sup> Kayonyat adi ain kudup ginen dafafanen diweij nabugon. En mede yoyonij adi ime ham ginen bemkula imeham tolak nabugon. <sup>16</sup> Kohon didimenijdi hinantilamek 7 boi yakuk, en manij ginanej miknon mikit hinek nij manij fukufukun imikimikiyenitdi fonduhuna yakuk. En namanda adi mele fafanejen diwelak undun nabugon hautaguk.

*Kumuja kaikagukdi Jon niwihiguk*

<sup>17</sup> Nu folonamandanij undinij kan heben folon maan kumun ti hakiij nabugon dahakut. Dahatuwene kohon didimenijdi foloone folon kamej indij naniuguk. “Du munta mu tiben. Timej hatigutdi mindan hatibaat <sup>18</sup> tinj hatihati molom, na injakon. Indij nadiwen. Nu kumuja kaikagutdi kaipmun hatiluwaat. Nij i nadi. Kumun en ham dinij talik tehep’wala yeme youdilitom u nu kamehatilat. <sup>19</sup> Ale du nemek mintaguk kanan, be indidegon mintalak, be mindan mintawaak u wana youdapmawen. <sup>20</sup> Tinj kohone didimenijnenkade hinantilamek 7 en kaman boidok kwehik 7 goldi tutumbanjit wana yabunan wondinij mebi ganimbe nadiwen. Hinantilamek 7 uyadi Kayonbop 7 adi’wala anelo, en kaman boidok kwehik 7 uyadi Kayonbop 7.”

## 2

*Efeso Kayonbop mede kameyemguk*

<sup>1</sup> Me wendi koti tomboyoula Jon indin nɨnguk. “Efesohi Kayonbop’walaŋ aŋelohikdok mede indin youleŋ. Hinantilamek 7 kohon didimeninɗi mongola kamaŋ boidok kwehik 7 goldi tinɗit lekinŋonhik gineŋ uŋambuŋat tilakdi hiditok indin yolak. <sup>2</sup> Nu titinɗihikdok, be kwanaihikdok, be fafaŋehik dinin mebi a nadilat. Hidi yadi me kadakahi yabukabeleen biyabu mu tiin. Undun dokɗina me nolidi inde aposel yonɗa yalaŋ yobune yalaŋ medehik dinin mebi tubudakalegin. <sup>3</sup> Tina fafaŋe tina hatinɗila nutok tina mik-kwadi gineŋ folofigita nadinɗila nadigweheyenit mokit hatigin. <sup>4</sup> Inŋon on, nu yadi nemek indin dokɗina hiditok nadiwene yomnit tilak. Hidi timen nutok mohinek nadinamgin inŋon kobuk indinde wondok tuwolit mu nadinamiin. <sup>5</sup> Koom fafaŋe tina hatigin inŋon nai indide adi gweheyeen fofon tiin. Ale hidi wendok nadisuŋa welehik tubutakaleen titinɗihik koom tigin u kotigon tineen. Undun mu tineen adi nu busuwaan kamaŋhik holomtibaat. Biyagon kuyon, welehik mu tubutakaleneŋ adi unduku tibaat on.

<sup>6</sup> “Inŋon titinɗihik nin tubune utumba tilak uye indin. Nikolas menɗimenɗiyedi nemek tubune yabuŋa nadikadakain wondok adi nu maan undugon tilat. <sup>7</sup> Munabulidi Kayonbop mede yenilak uyadi nebek ninɗi nadidakalewe kan magi baigon kametnadinɗa nadiwaak. Undun dokɗina meenin nin adi kwanai fafaŋe tina titawoon tubudapmaune Bepaŋ’walaŋ fiye momoon\* gineŋ

---

\* **2:7:** Bepaŋ’walaŋ fiye momoon wou Gilik mede gineŋ adi “Paladais” yoin.

hatihati bem dinin foloonj mintalak u nananjok kedem nindapmawaat.”

*Simena Kayonbop mede kameyemguk*

<sup>8</sup> Me wendi koti tomboyoula Jon indin ninjuk. “Simenahi Kayonbop’walaŋ aŋelohikdok mede indin youlenj. Timenj hatiguk eŋ mindanj hatibaak tinja kumuŋa kaikagukdi hiditok indin yolak. <sup>9</sup> Hidi mik-kwadi tihambune ikulema mu tinja fiyewakahi hatiin u a nadilat inŋon oŋ, kunum ginenj hidi’walaŋ bomboŋ fee ihamiin. Tinja unduŋon Judame nolidi mede kadakanin haninja hanintifoŋ u maan a nadilat. Ala adi yadi Judame hinek moŋ, adi yadi Sadaŋ’walaŋ metamjiye. <sup>10</sup> Hidi yadi nemek maŋin mikit kotigonj mintahambaak wondok munta mu tiyaneenj. I nadinenj, Sadaŋ adi tikamanda tihamdok hidi’walahi me noli yot fafaŋenin ginenj yapmewaak. Kaŋ hidi’walaŋkade mik-kwadi melenai 10 mintawaak. Inŋon oŋ, hidi yadi Bepaŋ’walaŋ mede didimeninŋon kamehatigene kumumbune hatihati fafaŋenin dinin kulunj tehindilendileŋnitdi mokohambaat. <sup>11</sup> Munabulidi Kayonbop mede yenilak uyadi nebek ninji nadidakalewe kaŋ magi baigonj kametnadiŋa nadiwaak. Unduŋ doktinja meenin nediyen kwanai fafaŋe tinja titawoonj tubudapmawaak adi yadi kumuŋ fafaŋeninji mu tubukadakawaak.”

*Pegamam Kayonbop mede kameyemguk*

<sup>12</sup> Me wendi koti tomboyoula Jon indin ninjuk. “Pegamamhi Kayonbop’walaŋ aŋelohikdok mede indin youlenj. Miknonj maŋin fukufukunj mikit

kamehatilakdi hiditok indin yolak. <sup>13</sup> Hidi yokwet hatiin, wendinin mebi a nadilat. Unon adi Sadañdi yolikweli tuguk. Kañ hidi adigili nutok tinã medene didimeningon kame hatiin. Nu'walañ mede tilolon mohinek tuluguk, notne momoon Antipas, adi yohikwehik Sadañdi itoulakneñ ungon hinek-ku ukin, kañ hidi nai unaningon nu nadisukilitinamuña gweheye mu tigin. <sup>14</sup> Ingon on, nu hiditok nadiwene kabe-tuwot mu tilak. Hidi'walañ yohikwehinen meenin noli hatiin, adi Balamdi tuguk undun tiin. Balam adi indin tuguk. Balakdi Isilae metam yehitubu-kadakadok nadinã Balam nimbune Isilae metam yenihohokeneune nemek welewele boinã Bepañ yonã bepañ yalayalañ muni heyemagin. Undun tinã siloda en kefile kwanai tinã kadakagin. <sup>15</sup> Ala hidi'walañ yohikwehinen meenin noli adi Nikolas menjimeniye'walañ titin u keleen tiin. <sup>16</sup> Undun doktinã hidi welehik tubutakaleneñ. Biyagon hinek kuyon, hidi undun mu tineñ adi nu pilap hinek buña meenin undihi mane dinin miknon mikitdi widihiwaat. <sup>17</sup> Munabulidi Kayonbop mede yenilak uyadi nebek ninñi nadidakalewe kañ magi baigon kametnadinã nadiwaak. Meenin nin titin fofoon giginã tinã titawoon tubudapmawaak adi yadi mana† hebinin mintoiwaat. Tinã nin indin, kawade fafau mimbaat. Tinã wou kobuli ungon youle halune molom ne kubugonñi kañ nadiwaak.”

---

† **2:17:** Mana adi nanañe Bepañdi Isilaehi kwet fileñ yemtoiguk. Kahat u Kisim Bek 16 ginen kunali kakanok.

### *Tayataila Kayonbop mede kameyemguk*

<sup>18</sup> Me wendi koti tomboyoula Jon indin ninguk. “Tayataila Kayonbop’walaŋ aŋelohikdok mede indin youleŋ. Bepaŋ’walaŋ mihi, dawi kudupmebem nabuŋ, eŋ kayon ain kudup dafafaŋeŋ giminiŋ diweŋ nabuŋ, adi hiditok indin yolak. <sup>19</sup> Nu titiŋhik diniŋ, be welesiloŋhik, be nadisukilitihik, be kwanaihik diniŋ mebi agaŋ nadilat. Tiŋa folofigita mintahambune gicine tiŋa fafaŋe tiŋa diniŋ mebihik maŋ a nadilat. Tiŋa koom gicine tigiŋ iŋŋon kobuk adi gicine hinek tiŋa, u agaŋ nadilat. <sup>20</sup> Iŋŋon oŋ, indin doktiŋa nu hiditok nadiwene kadakalak. Hidi tam Jesebel kakabeleŋ bikabune adi “na polofet tam” yoŋa nu’walaŋ metamneye yenihohokeneŋ mede yeniyehitubu-didimeune bepaŋ yalayaŋ’walaŋ hinamuni tiŋila siloda kadakanin tiŋa kefile kwanai tiŋa. <sup>21</sup> Adi yadi welen tubutakaledok nai timiŋgut, iŋŋon oŋ, adi welen tubutakaleŋ siloda tiŋa kefile kwanaiŋ bibiŋdok mu yolak. <sup>22</sup> Nadiŋbe? Nu wendegoŋ tiŋa yobene yagit fafaŋeniŋ mintamimbune halaak, eŋ adut kefile tiŋa adi yadi yagit folofigita kisaŋ mintayembaak. Tam wendi’walaŋ titiŋ hogoli mu wabineŋ adi unduku tiyembaat oŋ. <sup>23</sup> Tiŋa wapmihiniyedok yobene yagit fafaŋeniŋ tiŋa kumuneŋ. Unduŋ tibene yokwetkwet kayonbop adi nu adi’walaŋ welehiŋ diniŋ mebi nadidapmalat u nadidakaleneŋ. Nu meeniŋ wanakaŋ titiŋhikdok kibikoŋ tubu-udanehambaat.

<sup>24</sup> “Tayatailaihi meeniŋ noli hidi yalaŋ mede u



sigilulum timiin, tiņa meenin nolidi Sadan'walaņ mede nadihinakayam yoiņ, adi mu yehitomboyoukiņ, hiditok indin yobe nadiņeņ. Nu hidi nemek malabumuņ noli nemu hamulat. <sup>25</sup> Unduņ doktiņa nemek u be u hahamulak u gitagoņ boihatilune busuwawaat. <sup>26</sup> Meenin nin adi fafaņeņ nu nadilat u titawooņ tubudapmawaak, adi yadi nu saņiniņ mimbene <sup>27</sup> tot fafaņeņ maliņa meenin Judahi'walaņ feknit mokit kwetkwet hatitawiin hati yehitubu-didimeņ yabudokowaak. Tiņa nemek kwet kabot nabugoņ upupuheneyam unduņ tiyembaak. Nu batnedi saņiniņ namuņguk unduku aditokbo mimbaat. <sup>28</sup> Tiņa bamholiņa wapum maan tomboyoula mimbaat. <sup>29</sup> Munabulidi Kayoņbop mede yenilak uyadi nebek niņdi nadidakalewe kaņ magi baigoņ kametnadiņa nadiwaak."

### 3

#### *Sadis Kayoņbop mede kameyemguk*

<sup>1</sup> Me wendi koti tomboyoula Jon indin niņguk. "Sadishi Kayoņbop'walaņ aņelohikdok mede indin youleņ. Bepaņ'walaņ Munabuli 7 eņ hinan-tilamek 7 yabudokolakdi hiditok indin yolak. Nu titiņhik diniņ mebi a nadilat, meeniņdi habune kaipmuņ hatiņ nabugoņ tilak, iņgoņ welehiķ adi kumiin. <sup>2</sup> Unduņ doktiņa hidi kaikaan pilali titiņhik hahamulak u tubufafaņeune undugoņ hatuwaak. Nadiiņbe? Nu Bepaņ'walaņ namanda foloņ titiņhik kawene tuwot mu tilak. <sup>3</sup> Hidi yadi nemek hamuņjit be hanihehitubu-didime

tiñit, u tubukaikaan gitagon mongo hatiña wele-hik tubutakaleneen. Mu pilali hatineen adi kubomedi busuwain nabugon busuwahambaat. Biyagon hinek kuyon, hidi yadi naine kabe-nemu nadilune busuwahambaat. <sup>4</sup> Sadis yopman unon mehimehiye noli hatiin, adi yadi dahidahihik dagik mu tigin. Ala undihi adi kaugon hati-gene dahidahi fafau dahina nukut hatineen. Adi yadi undun tiin doktiña nadiyembene utum-balak. <sup>5</sup> Meenin nin adi fafañe kwanai tita-woon tubudapmaune dahidahi fafau mimbene dahiwaak, en wou hatihati fafañenin dinin pepa ginen hatak u mu tumolokulaat. Mon. Nu yadi wou Batne'walañ namanda folon en anelonje namandahik folon yohautawaat. <sup>6</sup> Munabulidi Kayonbop mede yenilak uyadi nebek nin di nadidakalewe kan magi baigon kametnadiña nadi-waak.”

### *Filadelfiya Kayonbop mede kameyemguk*

<sup>7</sup> Me wendi koti tomboyoula Jon indin ninguk. “Filadelfiya Kayonbop'walañ anelohikdok mede indin youlen. Biyagon hinek kuyon, hatihati ungonin molom en mede biyagon molom, Dewit'walañ yeme youdilitom kamehatiña talik yeme dilitombune nebek nin di tuwot mu tehewek, be youkilitiune nebek nin di tuwot mu dilitombek, adi hiditok indin yolak. <sup>8</sup> Nu titiñhik dinin mebi a nadilat. I nadinen! Nu namandahik folon talik tehep nin dilitom hamungut u nebek nin di tuwot mu tehekilitihambaa. Hidi'walañ sanjiniñ kuyaniñ-kabe hatak u agañ nadilat, ingon on, hidi fiit wotnenegigit gigine

tiņa didimeningon kamehatigin. <sup>9</sup> I nadineņ, Sadan'walaņ mebop niņ adi yadi Judame foloon hinek moņ, foloonnit mokit hatiņila yalaņ yo hatiņ, ale nu yeniņkule hidi'walaņkade woon mulelem tihamuņa, nu menot tihamgut wendiniņ mebi nadineeņ. <sup>10</sup> Eņ hide yadi nutok gweheye mu tiņa fafaņe tiņa woomnamdok haniņgut, u didimeningon kamehatigin doktiņa nubotikamanda nai wapum foloņ hehitubulodawaat. Tikamanda uyadi kwetkwet meeniņ hatitawiņ wanaņ mintayembaak. <sup>11</sup> Nu adi pilap baat, doktiņa hidi nemek moņgo hatiņ u fafaņeningon boikilitiņa hatilune nebek niņdi kulunhik tehindilendileņnit u mu holomtibaak. <sup>12</sup> Meeniņ niņ adi fafaņe kwanai titawoon tubudapmawaak adi yadi Bepaņ ne'walaņ Silonyot diniņ taka kobumuņ kambiyale fafaņeniņ yalaak. Tiņa adi foloņ Bepaņne'walaņ wou youlaat, eņ Bepaņne'walaņ yolikweli wou u maan adi foloņ youlaat. Uyadi Jelusalem yokwet kobuli kuyon, kunumneniņ Bepaņne'walaaniņ fowaak. Tiņa nu na'walaņ wotnene kobuli maan adi foloņ youlaat. <sup>13</sup> Munabulidi Kayonbop mede yenilak uyadi nebek niņdi nadidakalewe kaņ magi baigon kametnadiņa nadiwaaak."

*Leodisiya Kayonbop mede kameyemguk*

<sup>14</sup> Me wendi koti tomboyoula Jon indin niņguk. "Leodisiya Kayonbop'walaņ aņelohikdok mede indin youleņ. Mede biyagon molom, eņ yohauta foloon, eņ yofafaņe tilak adi yadi Bepaņ'walaaniņ nemenemek mintaguk wondiniņ mebi ki hatilakdi dutok indin yolak. <sup>15</sup> Nu titiņhik diniņ

mebi a nadilat. Hidi gweheyenḡon mu hatiin, tiḡa unduḡon fafaḡeniḡon mu hatiin u nadilat. Gweheyenḡon be fafaḡeniḡon hatibe nadiḡa unduḡ hatineḡ on! <sup>16</sup> Gweheyen en fafaḡeniḡon lekiḡonḡhik folon gwehe-gweheyenḡon hatiin doktiḡa mane gineniḡ hehimadikulene foneen. <sup>17</sup> Hidi hidetok indin yoin, “Indi duhuduhu fee itnimiin, indi nemek lufomḡon mu tiyoukumun. Unduḡ doktiḡa nemek nemu lohineem.” Hidi mebihik tuwot mu nadiin, tiḡa ganiḡginek, fiyewak, hambeep, dauhipmik, en hambiyek hatiin, u mu nadidakalein. <sup>18</sup> Ale hanimbe nadinen! Nu’walaḡ gol, kudup gineḡ daan walanda hinek tuguk u tuwaan bombonit tineen, en dahidahi fafau tuwaan dahiune foon mekahik kufulahebaak, tiḡa dauhik diniḡ haguwo tuwaan dauhik youtela diwehautaneen. <sup>19</sup> Nu me yabukahile tilat adi yenindidime en udihina yehitubu-didime tilat. Unduḡ doktiḡa hidi yadi gigne tiḡa welehik tubutakalenen. <sup>20</sup> I nadinen! nu welehik diniḡ yeme sigineḡ yali youtnadilat. Ala nebek nin adi medene nadiḡa yeme dilitomnambune adi’walaḡ welen maanen foon adut ipilat tiḡa nanane nademeet. <sup>21</sup> Nebek nin adi fafaḡe kwanai titawoon tubudapmaune nubo nihamanewe mapme pop folon ila metam yabulidoko kwanai nonḡon tidemeet. Na maan unduḡon fafaḡe kwanai titawoon tubudapmawene Batnedi ne’walaḡ mapme pop gineḡ iitdok naninehimaneguk. <sup>22</sup> Munabulidi kayonbop mede yenilak uyadi nebek nin di nadidakalewe kan magi baigon kametnadiḡa nadiwaak.”

## 4

*Jondi Bepañ'walañ kweli kagut enj tonadifo kap nadiguk*

<sup>1</sup> Nu nemek u kanadi tubudapmaan daune diween kunum ginen talik yeme niñ hamap yalu kagut. Tiña mede koom bai gigilit nabugon nadigut wondigon kotigon mintaan indin naninguk. “Du inon labune kougou hatigene nemek mintawaak u ganindakalewene kawen.”

<sup>2</sup> Unduñ yobune unaningon Ungoniñ Munabulidi saniniñnit hinek fotokinambune kunum ginen mapme pop niñ ikuk, wendok ginen Me niñ ilu kagut. <sup>3</sup> Tiña mapme pop ginen ikuk adi'walañ folonamandap adi hayaña nabugon ala giminda walawalañen hinek. Enj pop bokinenj adi kwembeke kudidi kelemadiguk, folonamandapniñ kaikailen enj walañen hinek.

<sup>4</sup> Enj mapme pop wapum kelemadiña mapme pop kuyahi 24-yen ilaugin, kan wendok ginen talitimen 24-yen ilaugin. Adi yadi dahidahi fafau hogohogok dahiña ikin, enj kulunhik tehindilendilenit goldi tutumbagin u mebihik folonj udiyen ikin. <sup>5</sup> Kanj pop wapum gineniñ maninguhut\* enj filimpit tiña munkulap gibitan toguk! Enj pop tehindilendilenit heben folon kudupmebem 7 yadagin. Uyadi Bepañ'walañ Munabuli 7-di danegin. <sup>6</sup> Tiña undugon pop tehindilendilenit namanda folonj imengwan galasdi tinjit nabugon walañen hinek niñ hakuk.

---

\* **4:5:** Bepañ'walañ mede saniniñnit wondiniñ mebi yobihitak.

Kaṅ pop tehindilendileṅnit hebenṅ foloṅ nemek hatihatihinit 4-yeṅ ikelemaḍigīṅ, adi yadi hebeniṅkade be sigihiniṅkade dauhik hogohogok ikelemaḍigīṅ. <sup>7</sup> Niṅ adi laion nabugoṅ, eṅ niṅ adi makau maaniṅ nabugoṅ, eṅ niṅ adi namanda meeniṅ nabugoṅ, eṅ niṅ adi baḡi suwaye wole tilak undiniṅ. <sup>8</sup> Nemek hatihatihinit 4 adi hogohogok adi papalihik 6 hogohogok, tiṅa undugoṅ papalihik wahīṅkade be hapmeniṅkade dauhik hadapmaguk. Kaṅ helebufa tuwot, indiṅ kutigiṅ,  
 “Wapum Bepaṅ Saṅiniṅ molom adi yadi uṅgoṅiṅ, uṅgoṅiṅ, uṅgoṅiṅ hinek, hatigukdi hatilak eṅ kotigoṅ baak.”

<sup>9</sup> Biyagoṅ kuyoṅ, nemek hatihatihinit 4 adi Hatihati Fafaṅeṅiṅ Molom, pop tehindilendileṅnit gineṅ itak adi niutumbe eṅ tonadifo timiṅ. <sup>10</sup> Adi unduṅ tulune talitimeṅ 24 adi yehitomboyoula Hatihati Fafaṅeṅiṅ Molom pop tehindilendileṅnit gineṅ itak adi'walaṅ hebenṅ foloṅ duwokeneeṅ nintiṅalooṅ popṅiṅ mebiyeṅ kulunḡhik tehindilendileṅnit udila boiṅa indiṅ yoiṅ,

<sup>11</sup> “Wapumnik Bepaṅ, tinahukut kinonom, eṅ woho wapum eṅ saṅiniṅ uyadi da kahileune tuwot hinek tilak. Biyagoṅ hinek, dagoṅ nemenemek tubuminta-dapmaguṅ eṅ du'walaṅ mede doktiṅa nemenemek mintadapmaguk hatak.”

## 5

### *Pepa bilibetnit niṅ nīpmekdi galikilitinit*

<sup>1</sup> Kaṅ mapme pop gineṅ ikuk adi kohoṅ gineṅ pepa bilibetnit niṅ kame ilune kagut. Pepa

wonj adi siginenkade be hebenjenkade wanan kudinit hakuk, tinja nipmek 7-di galikilitinjit. <sup>2</sup> Kanj anjelo sanjinjnit kagut, adi mede indin kutifiyeen yohautaguk. “Meenin nebek didimenin hinekdi nipmek kibidakula tanakiyeune tuwot tibek.” <sup>3</sup> Undun yobune kunum folonj be kwetfolonj be kwet falipmenj nebek ninji pepa nipmeknin kibidakula kakanjok be yokunatdok mu lodaguk. <sup>4</sup> Tinja nebek ninji fifigonj nemu hatinja pepa u tanakiyeen yokunakuk doktinja bulaninjon nadinja kisanj kokut. <sup>5</sup> Undun tibene talitimenj heki adi’walaanin ninji indin naninjuk. “Biyagonj hinek, makat mu kolej, binja i nadiwenj. Juda’wala yalakinije’walaanin laion nin mintaguk. Mapme Dewit’wala yalakinin ninji me mikniye yehiyalitifoong fafaneguk doktinja adi pepa nipmek 7-di galikilitiginj u kibidakula tanakijedok tuwolit tilak.”

### *Jondi Dompa Mihininj kaguk*

<sup>6</sup> Kanj nu daune diwenj mapme pop enj nemek hatihatihinit 4 adi’wala lekinjonhik ginenj enj talitimenj hekidi yakelemadi tiginjenj unjon Dompa Mihininj ninj uut tinjit nabugonj yalu kagut. Keleu 7, enj dawi maan undugonj 7. Dawi 7 uyadi Bepanj’wala Munabuli 7, adi yadi kwetkwet yeninjulinjit hatitawin. <sup>7</sup> Kanj Dompa Mihininj woong mapme pop ginenj ikuk adi’wala kohon didimenin ginenj pepa bilibetnit hakuk u tiguk. <sup>8</sup> Pepa bilibetnit u tibune nemek hatihatihinit 4 enj talitimenj 24 adi Dompa Mihininj’wala hebenj folonj maan foon duwokenegin. Adi hogohogok adi baiwagimhinit, enj malin goldi tinjit

u wanaŋ yohoneeŋ dahakiŋ. Maliŋ maanenŋ adi hemundumunduŋe momooŋ diniŋ mupmuk labuguk, uyadi meeniŋ Bepaŋ nadisukilitimiŋgiŋ adi'walaŋ ninadi. <sup>9</sup> Unduŋ tiŋa adi kap gitipmuŋ niŋ indiŋ togiŋ.

Dagoŋ pepa tiŋa nipmek kibidakulune tuwot hinek tilak. Du gulune naŋgatgedi kwetkwet meeniŋ folonamandap uŋgoniŋ uŋgoniŋ, eŋ mede waliniŋ uŋgoniŋ uŋgoniŋ yehisidokoune Bepaŋdok gigit tigiŋ. <sup>10</sup> Unduŋ tiŋa yeguŋ e' yehibopneune Bepaŋ'walaŋ yokwet momooŋ diniŋ Kayoŋbop eŋ siloŋ kwanai diniŋ talitimenŋjiye mintagiŋ. Ala adi kwetfoloŋ mapme mintaŋ metam yabu-ulidoko kwanai tineeŋ.

### *Kunum gineŋ tonadifo wapum mintaguŋ*

<sup>11</sup> Kaŋ nu daune diweŋ aŋelo mohok fee muyeŋ hinek yabuŋa mahik gigit maanŋ nadigut. Adi yadi mapme pop eŋ nemek hatihatihiniŋ 4, eŋ talitimenŋ heki yehikelemadiŋa yaŋiŋ. Kunakunat indiŋdi yali ugiŋ: 10 tausen mohomohok, eŋ 1 miliyen mohomohok yali ugiŋ. <sup>12</sup> Tiŋa gigit wapum toŋa indiŋ yogiŋ, “Dempa Mihiniŋ uut tiŋit adiyenŋ saŋiniŋ loloŋnit, eŋ nadinadi fuliŋ, eŋ fafaŋe, eŋ wou wapum, eŋ nemenemek kinonom eŋ yopilapilaye, nemenemek momooŋ hogohogok i adi kahileune tuwot hinek tilak.”

<sup>13</sup> Kaŋ kunum gineŋ, be kwetfoloŋ, be kwet falipmeŋ, be imeŋgwaŋ gineŋ nemenemek hati-tauiŋ hogohogok adi indiŋ tobu nadigut.



“Mapme pop ginenj itak enj Dompa Mihininj adi wananj yopilapilaye, enj wohikgigit wapum, enj wohikgigit hautanit, enj sanjinj lolonjit hayemilak wondigonj fafaneninj hayemiluwaak.”

<sup>14</sup> Kanj nemek hatihatihinit 4 adi yoginj, “U biyagonj.” Kanj talitimenj hekidi maanj duwoke-  
neenj hali niutumbaginj.

## 6

### *Kale wosi 4 adi'walañ mede*

<sup>1</sup> Kanj nu daune diweenj kagut, Dompa Mihininjdi pepa nipmek 7-di galikilitiginj u kubugonj ninj kibidakukuk. Kibidalune nemek hatihatihinit 4 adi'walaaninj ninjdi munjuklap nabugonj kutinja yoguk. “Benj!” <sup>2</sup> Yobu yali kawene kale wosi fafau ninj labunja buguk. Siginj folonj me ninj ikuk adi yadi tebenijnit, tinja mapme dininj sanjinj wapum u mimbune mikme mintaanj uune nemenek hogohogok sanjinjhinit adi, adi'walañ falipmenj udapmaginj.

<sup>3</sup> Kanj Dompa Mihininjdi nipmek galikiliti 2 u kibidakulune nemek hatihatinit kunakunat 2-di kutinja yoguk, “Benj!” <sup>4</sup> Yobu yali kawene kale wosi gimininj wip hinek busuwaguk. Siginj folonj me ninj ikuk adi yadi kwetfolonj kulema kekulune meeninjdi kiutubuliwe titindok sanjinj minjit, tinja miknonj wapum maanj minjit.

<sup>5</sup> Kanj Dompa Mihininjdi nipmek galikiliti 3 u kibidakulune nemek hatihatinit kunakunat 3-di indinj kutiguk. “Benj!” Yobu yali kawene kale wosi gouyeninj busuwaguk. Me ninj siginj folonj ikuk adi sigeli (tuwolit kameka) honeenj

ikuk. <sup>6</sup> Kaṅ nu nemek hatihatihinit adi'walaṅ baṅamhik gineṅ meeniṅ mede nabuḡoṅ indiṅ yobune nadigut. “Pandiṅ bet kuyaniṅ eṅ palawa bet kuyaniṅ tuwaṅiṅ 40 kina, eṅ olif galik be wain ime adi yehitubukadaka mu tiṅa biyabune unduḡoṅ itneeṅ.”

<sup>7</sup> Kaṅ Domba Mihiniṅdi nipmek galikiliti kunakunat 4 kibidakulune nemek hatihatinit kunakunat 4-di indiṅ kutibune nadigut. “Beṅ!”

<sup>8</sup> Yobu yali kawene kale wosi folonamandap kumuhaṅjandaṅdi buguk. Me niṅ sigiṅ foloṅ ikuk adi'walaṅ wou adi Kumuṅ. Ham gineṅ itouḡiṅdi hebeṅ foloṅ hinek kelenṅ bugiṅ. Kaṅ kwetfoloṅ yowo lufomkulitniṅ hogok hatune kwet yowo noli wondok yobune, mikdi, eṅ map wapumdi, eṅ yagit kadakanṅdi, eṅ kale moihi miknitdi, meeniṅ yehitubu-kadakadok saṅiniṅ yemgiṅ.

*Meeniṅ Bepaṅ'walaṅ mede doktiṅa udihiḡiṅ adi'walaṅ welehik yabuguk*

<sup>9</sup> Kaṅ Domba Mihiniṅdi nipmek galikiliti kunakunat 5 kibidakukuk. Unduṅ tubune meeniṅ Bepaṅ'walaṅ mede kamehatiṅa medeṅiṅ yohau-taune udihiṅit adi'walaṅ welehik alta falipmeṅ halune yabugut. <sup>10</sup> Adi kutifiyeenṅ yogiṅ,

“Wapumnik, Saṅiniṅ Molom, du Uṅḡoniṅ eṅ Biyagoṅ Molom. Du deniṅ kwetfoloṅ meeniṅ hatiṅ kibikoṅ yembaaṅ, eṅ indi'walaṅ naṅgatnik diniṅ kibikoṅ wobuyembaaṅ?”

<sup>11</sup> Unduṅ yobune dahidahi fafau molomolom yemdapmaanṅ indiṅ yeniṅiṅ. “Tipilapilaye nohiye unduḡoṅ widihikumumbune yokunathikdi

hidut tomboyoulune tuwot titiᅅdok muniniᅅ woom hatineeᅅ.”

*Kibikoᅅ nai foloᅅ nemek mintawaak wondok mede*

<sup>12</sup> Kaᅅ nemek niᅅ indinᅅ kagut. Domba Mihiniᅅ adi nipmek galikiliti kunakunat 6 kibidakulune kenim wapum tuguk. Kaᅅ mele adi gouyeᅅ kabot siginᅅ dagouyeᅅ diwelak undiniᅅ tuguk, kaᅅ muyakip adi yadi naᅅgat undiniᅅ tuguk. <sup>13</sup> Kaᅅ hinantilamek heki adi sububadi kalip kaip-muhi fedigolopmaune mainᅅ, unduᅅ kunumneninᅅ kwetfoloᅅ maanᅅ foginᅅ. <sup>14</sup> Kaᅅ kunum adi pepa bilibeneyam unduᅅ nabugoᅅ bilibetneᅅ liweguk. Eᅅ kweboboe, eᅅ kwet kambanᅅgit adi kwehik iit tiinᅅ bikabuᅅa uginᅅ. <sup>15</sup> Nemek unduᅅ mintaune kwetkwet mapme, eᅅ me bombonᅅgi eᅅ me tal-itimeᅅ tubune mik taginᅅ, eᅅ muneeᅅ bombonᅅ fehinit, eᅅ me saniniᅅhinit, eᅅ meeniᅅ loloᅅnit, eᅅ fofonᅅnit wanakaᅅ hogohogok kwet be kawade ginaneᅅ hebi ila <sup>16</sup> kweboboe eᅅ ham kutiyeniᅅa indinᅅ yoginᅅ. “Hidi maᅅfooᅅ nihikufulaᅅa nihikamehebiune mapme pop gineᅅ itak adi’walaᅅ namanda foloᅅ mu mintanim. Eᅅ Domba Mihiniᅅ’walaᅅ kwihita mu kanim. <sup>17</sup> Kwihitahik diniᅅ nai tilak doktiᅅa meeniᅅ nediyeᅅ kelekufulak?”

## 7

*Meeniᅅ demehik foloᅅ youkudip tiyemgin*

<sup>1</sup> Kaᅅ nu daune diweᅅ aᅅelo 4 yabugut, adi yadi kwet diniᅅ tuᅅ 4 uᅅoᅅ yali kwetdiniᅅ sub-uba 4 moᅅgoyakinᅅ. Kwetfoloᅅ, be imeᅅgwan

folon, be bem folon sububadi mu feditdok undun tigin. <sup>2</sup> Kan mele labulabunenƙade aŋelo nin labune kagut. Adi yadi Bepaŋ Hatihati Molom adi'walaaniƙ fek kame hatiguk. Kameŋ hatiŋa aŋelo 4 kwetfolon, eŋ imenƙwan folon fana titinƙdok yeniƙiti adi kutihautaan indin yeniƙguk. <sup>3</sup> "Hidi kwetfolonbe, be imenƙwan folon, be bem folon fana pilap mu tineen. Indi timen Bepaŋ'walaŋ metamniye demehik folon fek kame yemineem."

<sup>4</sup> Undun yobune meeniƙ fekhinit'walaŋ kunakunat indin yobune nadigut. "Isilaehi'walaŋ bop ginenin 144 tausen fek kameyemiƙiti. <sup>5</sup> Juda'walaŋ bop ginenin 12 tausen fekhinit, Luben'walaŋ bop ginenin 12 tausen, Gat'walaŋ bop ginenin 12 tausen, <sup>6</sup> Asa'walaŋ bop ginenin 12 tausen, Naftali'walaŋ bop ginenin 12 tausen, Manase'walaŋ bop ginenin 12 tausen, <sup>7</sup> Simion'walaŋ bop ginenin 12 tausen, Lewi'walaŋ bop ginenin 12 tausen, Isaka'walaŋ bop ginenin 12 tausen, <sup>8</sup> Sebulon'walaŋ bop ginenin 12 tausen, Josep'walaŋ bop ginenin 12 tausen, Benjamin'walaŋ bop ginenin 12 tausen." Meeniƙ undunƙi fekhinit tigin.

*Meeniƙ bop fee hineƙdi Bepaŋ'walaŋ heben folon yakiƙi*

<sup>9</sup> Nemek u kanadi tubudapmaan nimbo kagut. Kawene metam kwetkwet indigon tuwot folonamandaphik mebimebi, mede waliniƙhik mebimebi, bop wapum hineƙ, meeniƙdi yokunatk dok tuwot mon, undunƙi mapme pop eŋ Domba Mihiniƙ'walaŋ heben

folon yalune yabugut. Dahidahihik kweheyehi fafau hogohogok. <sup>10</sup> Tiņa kohohik ginen wonim hapmun mongo yali kutihautaan indin yogin, “Tutumbanik adi Bepanik, mapme pop ginen itak, adi’walaanin en Domba Mihinin’walaanin.”

<sup>11</sup> Kan anelo hogohogok mapme’walaan pop en talitimen heki, en nemek hatihatihinit 4 yehikelemadiņa yakin, adi mapme pop heben folon maan duwokeneen Bepan niutumbaan indin yogin,

<sup>12</sup> “Biyagon, yonadifo, en wougigit hautanit, en nadinadi fulin, en youtumba, en wou wapum, en saninin, en fafane uyadi Bepanik halimilakdi halimiņa woon halaak fafanenin. U biyagon.”

*Adi yadi folofigita tiņa bulaningon nadigin*

<sup>13</sup> Kan talitimen heki adi’walaanin ninđi naninadiņa yoguk. “Dahidahihik kweheyehi fafau hogohogok u nedi? Tiņa denahi bugin?”

<sup>14</sup> Naninadiune mede indin tubu-udanemingut, “Me wapumne, uyadi da agan nadilan.”

Kan naninguk. “Adi yadi memik hekidi malabumun en folofigita wapum hinek yembune nadi hatige bugin, en dahidahihik Domba Mihinin’walaan nanđatdi youtewalandagin.

<sup>15</sup> Undun doktiņa Bepan’walaan mapme pop heben folon hatinila helebufa tuwot Silonyotnin ginen tipilapilaye timiin. Undun tubune mapme’walaan pop ginen itakdi yamadi ila yoon tiyemilak. <sup>16</sup> Kan nanane imedok map kotigon mu tineen. Meledi be nemek nolidi foloohik mu yehidafigitawaak. <sup>17</sup> Mapme pop lekingon ginen Domba Mihinin yatak adikuyen yabudokowaak

on. Tiņa hatihati diniņ ime dawinenj yanagi uluwaak, eņ Bepaņdi yeniwihi tiņa dautilitilihik hogohogok tumolokuyembaak.”

## 8

### *Aņelo 7 bai yemiņģiņ*

<sup>1</sup> Kaņ Domba Mihiniņ adi nipmek galikiliti kunakunat 7 kibidakulune kunum gineņ medemede be waliwali wabidapmaņ kabup hinek halune haf awa dok tuwot tuguk. <sup>2</sup> U dapmaune aņelo 7 Bepaņ hebeņ foloņ yaķiņ adi yabuluwene nolidi bai 7 yemiņģiņ. <sup>3</sup> Kaņ aņelo niņdi maliņ goldi tigiņ u tiņa buņa wooņ siloņ hemiņ alta hebeņ foloņ honeeņ yalune hemundumunduņe kwam fee ulugolomiņģiņ. Ulugolomimbune mapme pop hebeņ foloņ dumuņ hemiņ alta goldi tutumbagiņ ikuk wendok foloņ kameeņ Jesu nadisukilitimiņ heķi’walaņ ninadihik dut tomboyokuk. <sup>4</sup> Unduņ tulune kohoņ gineniņ mupmuk munduņ momooņ wondi Jesu nadisukilitimiņ heķi’walaņ ninadihik tubulodaune Bepaņ’walaņkade loguk. <sup>5</sup> Aņelo adi unduņ tiņa dumuņ hemiņ alta foloņ kudup finiņ moņgola maliņņiņ dahitokiņa kwatnekulune foguk. Foune filimpit, eņ maņģiņguhut,\* eņ muņķulap eņ kenim tuguk.

### *Aņelo 4 hekidi bai fedilune kwetfoloņ nemek mintaguk*

<sup>6</sup> Kaņ aņelo 7 bai yemiņģit adi bai feditdok tiulidokogiņ. <sup>7</sup> Tiņa aņelo kunakunat 1 adi bai

---

\* **8:5:** Maņģiņguhut adi nemek figitaņ be malabumuņ nai gineņ mede u yoyam.

fedilune gwi fifingobut, en kudup nangatdut miñobunjit wondi kwetfolonj maguk. Maune kwet faki wapum niñ kudup daanj bem noli en kilihikit hogohogok kudupdi dadapmaguk.

<sup>8</sup> Kañ añelo kunakunat 2 adibo bai fedikuk. Bai fedilune nemek niñ kweboboe wapum undiniñ kudupnit imenñwanj wapum gineñ kulune foguk. Kulune founne imenñwanj faki niñ nangatnit tubudapmaguk. <sup>9</sup> Kañ kale imeneñhi fee kumunñdampagin, en muwage noli imenñwanj wapum folonj yauginj fee kadakadapmagin.

<sup>10</sup> Kañ añelo kunakunat 3 adibo bai fedikuk. Bai fedilune bamholiña wapum niñ adi kunum gineniñ diliteleenj kamañ undiniñ dañeña ime dawi be ime miñ fee gineñ foguk. <sup>11</sup> Bamholiña wou Buukaanj Hinek. Unduñ doktiña ime fee bukadapmaune meeniñ ime u naañ mu-muyenñonj kumunñgin.

<sup>12</sup> Kañ añelo kunakunat 4 adibo bai fedikuk. Bai fedilune mele, muyakip en hinantilamek fee folonj haki mintaune hautahik faki gweheye tiginj. Unduñ doktiña hadapmo faki-kabe wendok tuwot mele mu diweguk, en timiñ undugonj faki-kabe wendok tuwot muyakip en hinantilamek heki adi mu hautaginj.

<sup>13</sup> Kañ daune diweñ bagi suwaye wapum niñ kagut. Adi yadi wahiñ foloniñ hinek hatiñila indinj kutihewodiguk. “Yakeee, yakeee, yakeee, añelo lufomkulitniñ adi’walañ bai u fedilune meeniñ kwetfolonj hatiñ adi dedinj tineenj ee!”

## 9

*Aņelo kunakunat 5 adi bai fedilune gihiwak miknit mintagin*

<sup>1</sup> Kaņ aņelo kunakunat 5 adibo bai fedikuk. Kaņ nu hinantilamek niņ kunum gineniņ diliteleen kwetfoloņ foune kagut. Adi yadi bom fuliņmamaņ diniņ namokop uditdok yeme youdilitom miņit.

<sup>2</sup> Kaņ bom fuliņmamaņ diniņ namokop udilune mupmuk wapum labuguk, fiye kogi henene daaņ mupmuk lolak wondok tuwolit labuņa looņ melebe, be hamap wapum tehedapmaguk.

<sup>3</sup> Mupmuk maaneņ adi gihiwak labuņa kwetfoloņ magiņ. Bepaņdi saņiniņ yembune adi maņgitalita nabugoņ metam yehisiune folofigita nadigiņ.

<sup>4</sup> Ala adi yadi kwetfoloņ kilihikit nanaņe, tite be bem hapmuņ heki mik mu tiyemdok yoņit, adi meeniņ Bepaņ'walaņ fek demehik foloņ mu hakuk adi hogok mik tiyemdok yoņit.

<sup>5</sup> Ala yehisiune kumuņdok moņ ale, hogok muyakip 5 wendok tuwot yehisifigitadok yoņit. Folofigita uyadi maņgitalitadi nindiune nadiyam wondok tuwot.

<sup>6</sup> Kaņ nai uņaniņ meeniņ adi kumuņdok yoneeņ iņgoņ oņ, tuwot mu kumuneeņ. Kumuņdok mohinek nadineeņ iņgoņ kumuņdi tuwot mu yehitubu-lodawaak.

*Gihiwak folonamandaphik diniņ mede*

<sup>7</sup> Gihiwak uyadi kale wosi nabugoņ, mikme hekidi mikde unene tinahukuyemiņ undihi hinek. Mebihik foloņ kuluņ goldi tiņit nabugoņ ikiņ, namandahik adi meeniņ namandap nabugoņ. <sup>8</sup> Dumuniņhik adi kweheyehi, fafau tam mebihik dumuniņ kweheyehi nabugoņ.



En mahik kitili adi laion mahik kitili undihi. <sup>9</sup> Siyohik folon kweletalak kapadi tinjit nabugon hakin. Papalihik dinin gigilit adi kalis gigilitnin nabugon. Kale wosi feedi mik ginen kalis fee yehiwodiyen kiyane tubune gigilit toin nabugon hinek. <sup>10</sup> Uyahik en mikhik adi mangitalita'walan undihi. Ukuyendi meenin yehisifigita hatilu muyakip 5 tibaak. <sup>11</sup> Adi'wala mapmehik adi bom fulinmaman dinin anelo wapumdi hatilak. Judame hekidi wou Abadon yogin, en Gilik mede ginen adi Apoliyon yogin. En indi'wala mede ginen "fana wapum". <sup>12</sup> Kan bagi suwayedi yakeee nai lufomkulitnin kutiguk, ala nin agan dapmalak, kan lufom kougon hogok hakamuk.

*Anelo kunakunat 6 adi bai fedilune mikme bop fee hinek mintagin*

<sup>13</sup> Kan anelo kunakunat 6 adibo bai fedikuk. Fedilune dumun hehen dinin alta goldi tinjit, Bepan'wala heben folon itak, mimim 4 ginen keleunit <sup>14</sup> unanin mede labuna anelo kunakunat 6 bai kameyakuk u indin ninguk. "Anelo 4 Yufeletis ime wapum ginen yehitehigin hatiin u fiyakuyemben." <sup>15</sup> Kan anelo 4 adi gulet, muyakip, melenai wondok folon kwetkwet meenin fee mumuyen udihikumundok woom hatigin, adi-ku fiyakuyeminguk on. <sup>16</sup> Kan mikmehiye kale wosi sigin folon iitdok kunakunathik 200 miliyen undun yobune nadigut. <sup>17</sup> Meenin be kale wosi adi'wala folonamandaphik adi lihine ginen dabugon indin kagut. Meenin adi kweletalak giminin wip hinek, en balimnit, en gwagwanit undihi

mongo hatiginj. Enj kale wosi heki'walañ mebihik adi laion heki mebihik nabugonj, mahik gineninj adi kudup, enj mupmuk, enj tebe maninj kuduphinit (salfa) labuginj. <sup>18</sup> Kañ kumunj fotaba lufomkulitninj labuginj wendi meeninj fana kisañ tiginj (Metam fee mumuyenj kumunjinj). <sup>19</sup> Kale wosi heki'walañ sañininj adi mahik ginenj enj uyahik folonj hakuk. Uyahik adi miñgembet nabugonj, mebihinit. Wendigonj meeninj kisañ yehitubu-kadakainj. <sup>20</sup> Kañ meeninj noli kumunkwane tulune bop ninj fiit biyabuginj adi yadi welehek mu tubutakaleginj. Enj hatihati be titinjhikdok nadiune kadaka mu tuguk. Monj, adi yadi yabap moihi ungonj mongo hatiginj. Enj bepañ yalayañ welewele goldi, enj silwadi, enj aindi, enj kawadedi, enj bemdi tutumbaginj u yeniutumbaginj. Adi yadi kanadi mu tiinj, enj unjat buñat mu tiinj, ingonj fiit yeniutumba hatiginj. <sup>21</sup> Tiña undugonj mik-kwadi, enj tubuhi, enj kefile, enj kubo, kadakaninj undihi u mu wabiginj.

## 10

### *Añelo ninjdi mede yokwambunda hinek tuguk*

<sup>1</sup> Kañ añelo sañininjit ninj kunum foloninj foune kagut. Adi yadi mulukwanjdi mumut timinjinj, enj mebi folonj kwembeke kudidi gwaiguk, namanda mele undininj, kayonyat kudupmebemnit. <sup>2</sup> Kohonjdi pepa kuyaninj ninj agañ tañakiyenit kameyakuk. Kayonj didimeninjdidi imenjanj wapum folonj yaliguk enj kayonj kapmadidi kwetfolonj yalinja yakuk. <sup>3</sup> Yali

wapumgoŋ kutiguk, laiondi mede tolak nabugon hinek kutiguk. Kutibune muŋkulap 7 togiŋ. <sup>4</sup> Muŋkulap toŋa mede yobune nadiŋa kudi youlit yoŋa tiluwene kunumneniŋ kutikuti niŋ nu'walaŋkade indiŋ buguk, "Muŋkulap 7-di mede yoŋit u mu youleŋ, hogok namokop tubune halek." <sup>5</sup> Kaŋ aŋelo imenŋwaŋ wapum foloŋ eŋ kwetfoloŋ yaliŋa yakuk, adi kohon didimeniŋ kunum foloŋkade kohodidim tiŋa mede yokwambundaguk. <sup>6</sup> Bepaŋ hatihatiniŋ dapmandapmaŋnit mokit adi nemenemek hogohogok yehitubuminta-dapmaguk adi'walaŋ wou foloŋ tebiŋa indiŋ yokwambundaguk, "Nai kotigoŋ nimaŋ mu hatak. <sup>7</sup> Aŋelo kunakunat 7-di baiŋiŋ fedilune mede tobaak, biyagoŋ hinek nai uŋaniŋ Bepaŋ'walaŋ mede hebiniŋ, koom kwanai-meniye polofet heki gigit yeniŋguk, wendiniŋ folooŋ hinek mintawaak."

### *Aŋelodi Jon pepa mimbu naguk*

<sup>8</sup> Kaŋ kunum gineniŋ mede nadigut uŋakoŋ kotigoŋ mintanŋ indiŋ naniŋguk. "Du wooŋ aŋelo imenŋwaŋ wapum foloŋ eŋ kwetfoloŋ yaliŋa yali pepa taŋakiyenit kameyatak u tibeŋ." <sup>9</sup> Unduŋ yobune nu wooŋ aŋelo pepa honeeŋ yakuk u namdok nimbene indiŋ naniŋguk, "Tiŋa na! Naweŋ kaŋ kabakeneŋ buukaŋ tibek eŋ mageneŋ adi kobaŋiŋ simiŋkupuk nabugonŋ tibek."

<sup>10</sup> Unduŋ yoŋa agaŋ pepa nambune nagut. Nawene mane gineŋ simiŋkupuk nabugonŋ kobaguk, ala kumuyewene kabatne gineŋ buka tuguk. <sup>11</sup> Kaŋ indiŋ naniŋgiŋ. "Du meeniŋ bop fee hinek, folonamandaphik eŋ mede waliniŋhik

mebimebi, tiņa mapmehiye aditok kigili mede kotigon yobaan.”

## 11

### *Jondi Bepañ'walaņ Silonyot kamekadok niņiņ*

<sup>1</sup> Kaņ nu ye kusek kameka kudinit niņ namuņa indin naniņguk, “Du pilali Bepañ'walaņ Silonyot, eņ alta kamekawen, tiņa wendiniņ maanen hatiņila Bepañ niutumba tiņ u yehikunalen.

<sup>2</sup> Eņ Silonyot diniņ wawali adi kameka mu tibeņ, hogok wabiune halek. Uyadi meeniņ Bepañ'walaņ fekhinit mokit aditok wabiyemiņit. Biyagon kuyon, adi muyakip 42 hatiņila Bepañ'walaņ yokwet ungoniņ u fana tineen.

<sup>3</sup> Kaņ nu'walaņ meyat lufom medene yohautadok yeniņkulene metam wele tubutakale mu tineen aditok bulaningon wapum nadiņa fiit melenai 1 tausen 2 handelet 60 hatiņila meeniņ kigili mede yenindemeek.”

### *Meyat lufom'walaņ mede*

<sup>4</sup> Meyat adi yadi bem olif eņ kamaņ boidok kweli undihi, tiņa adi kunumkwet diniņ Mapme'walaņ heben folon yakamuk. <sup>5</sup> Nebek niņdi meyat u memik tiyembaak adi yadi meyat'walaņ mahik gineniņ kudupdi labuņa yehidakumumbaak. Unduņ doktiņa nebek niņdi memik tiyembaak adi yadi unduku tiņa kumumbaak oņ. <sup>6</sup> Meyat adi yadi gwi talik tehep timindok saņiniņ hayemilak. Unduņ doktiņa adi yobune gwi mu ula hogok hatune kigili mede yohatidemeek. Tiņa unduņ, yobune imedi naņgatnit titiņdok saņiniņ hayembaak.

En kwetfolon yagit mebimebi mintaune kumon fotaba titindok yobune wondok tuwot mintaneen. <sup>7</sup> Undun tina Bepan'wala mede yohauta hatilune naihi dapmaune kale miknit bom fulinmaman hinek gine hatilakdi labuna adut mindobuna udihikumumbaak. <sup>8</sup> Meyat u udihikumumbune meeni di dabahiyat u biyabune yokwet wapum dini wawaliwen ungon dahatemeek. Yokwet wendok yoyout e' 'Sodom' dut 'Isip' yonit. Wapumnik yokwet ungon kolondabek folon ulune kumunguk. <sup>9</sup> Kan kwetkwet meeni fee folonamandaphik mebimebi, en mede walinihi mebimebi wendi dabahiyat melenai lufomkulitni en faki hogokni wendok tuwot hati yabukuwatneen. Tina nolidi yehiwenefuladok yobune nolidi yenihep tineen. <sup>10</sup> Tina polofet yakat adi meeni folofigita kisan yemingumuk doktina kibibo meeni kwetkwet tonadifo tina bombondi silon kibikibi tineen.

<sup>11</sup> Ingon on, melenai lufomkulitni en faki hogokni dapmaune Bepan'walaani hatihati dini munabulidi dabahiyat gine foune kaikaan pilakumuk. Pilalune meeni adi yabuna boho tina mamihik teleguk. <sup>12</sup> Undun tulune kunum foloni kutikuti wapum ni meyat adi'wala kade indin foguk. "Hidi inon labudemek." Kan memikhiye adi yali yabulune mulukwan maanen kunum gine logumuk. <sup>13</sup> Kan nai unani ngon kunum gine lolune kenim wapum tuguk. Yokwet wapum gine yot fee (1/10) golon fon yot fana tina meeni 7 tausen widihikumunjin. Un-

duŋ tubune moŋkaŋ meeniŋ kaipmuŋ hatigiŋdi muntaŋ Bepaŋ kunumneniŋ wou nintilogiŋ.

<sup>14</sup> Bagi suwayedi Yakeee nai lufomkultiniŋ kutiguk, ala kunakunat lufom diniŋ folooŋ agaŋ mintaguk. Kaŋ yoŋ adi agaŋ kubugoŋdok hogok hatak wadi pilap mintawaak.

*Aŋelo kunakunat 7-di bai fedilune nemek mintaguk*

<sup>15</sup> Kaŋ aŋelo kunakunat 7 adibo bai fedikuk. Bai fedilune kunum foloŋ baiham kakaŋ togiŋ. Toŋa indiŋ yogiŋ,

“Kwet wapum i wanaŋ hogohogok Bepaŋ Wapumnik eŋ kwanai-meŋiŋ Kilistodi kahiledapmayamuk. Kaŋ adi kubugoŋdi yodoko eŋ yodidime kwanai youdihinit tihatiluwaak fafaŋeniŋ.”

<sup>16</sup> Unduŋ tobune talitimeŋ 24 Bepaŋ’walaŋ hebeŋ foloŋ mapme pophik foloŋ ikiŋdi mulelem tiŋa duwokeneeŋ fooŋ hali Bepaŋ indiŋ yoŋa ninadifo tiŋa niutumbagiŋ,

<sup>17</sup> “Wapum Bepaŋ, Saŋiniŋ Molom, hatiguŋdi hatilaŋ, indi du ganinadifo eŋ ganiutumba tiyam. Du saŋiniŋge wapum taŋakieune mintalak, unduŋ tiŋa mapme kwanaige tububihila yodoko eŋ yodidime kwanaige miŋgoŋ tubuhautalaŋ.

<sup>18</sup> Meeniŋ kwetkwet kwihita tigiŋ doktiŋa dubo kibikoŋ tiyemdok naige tilak. Tiŋa kumuŋhinit’walaŋ mede yodapmaŋdok nai dulalak. Tiŋa undugoŋ tipilapilaye-megeye polofet heki, eŋ meeniŋ du nadisukilitigamgiŋ, eŋ nadigambune

loune gikiŋŋon tigamiŋ loloŋnit be fofonit tuwahik fofon hinek yemdok nai tilak. En kwet be metam kwetfolon inon yehitubu-kadakain heki adi kibibo yehitubu-kadakadok nai tilak.”

<sup>19</sup> Adi unduŋ tulune kunum folon Silonyot dil-itombune Bepaŋ’walaŋ yofolok dinin bogit wapum miŋŋon hakuk. Kaŋ nai uŋaŋiŋŋon filimpit, en maŋiŋguhut, en muŋkulap, en kenim, en fi-fiŋgobut wapum hinek mintaguk.

## 12

### *Kunum folon tam niŋ yakuk*

<sup>1</sup> Kaŋ kotigon kunum folon kudi niŋ indin mintaguk. Tam niŋ yakuk, adi yadi meledi tinahukuliminjit, en kayon hapmenen muyakip ikuk. Kaŋ hinantilamek 12 adi mebi folon kulun wele unduŋ ikin. <sup>2</sup> Ala adi yadi mihiwelenit, tina wapmihi nagitdok folofigita nadiŋa yakawe kisaŋ toguk. <sup>3</sup> Ala tam adi unduŋ hatulune kunum folon kudi niŋ indin mintaguk. Uyadi fowa kakaŋ niŋ mintaguk, folonamandapniŋ giminiŋ wip hinek, mebi 7 en kelevu 10. Mebi molo-molom folon mapme kulun ilaugin. <sup>4</sup> Kaŋ uyaŋdi hinantilamek noli (1/3) widihi moŋgo yakulune kwetfolon fugin. Fowa adi unduŋ tikabu, tam wapmihi nagile tulune indin nadiŋa wooŋ kamadi hakuk, “Wapmihi nagilune tikumuye tibit.” <sup>5</sup> Tamdi wapmihi nagikuk uyadi mihi. Ala mihi wondigon tot fafaŋen maliŋa hatiŋa meeniŋ kwetkwet yabudokodok niŋit. Unduŋ doktiŋa mihi mintaune nagiloon Bepaŋ’walaŋ mapme

pop itakneŋ hebenŋ foloŋ kamegiŋ. <sup>6</sup> Kaŋ tam adi momoŋ kwet fiilenŋ mauguk, ala uŋoŋ Bepaŋdi melenai 1 tausen 2 haŋdelet 60 wendok tuwot nanane ime miŋtoi timineenŋ yoŋa yokwet niŋ tiulidokoguk.

*Sadaŋ kunum gineniŋ kelekulu foguk*

<sup>7</sup> Kaŋ kunum foloŋ mik wapum mintaguk. Aŋelo wapumhik Maikol eŋ aŋeloŋiye adi fowa ula kelene meyout tigiŋ, kaŋ kibi fukuniŋ fowa eŋ aŋeloŋiye adi maanŋ meyout tigiŋ. <sup>8</sup> Ingoŋ oŋ, fowa meniye adi fafaŋe mu tigiŋ. Adi gweheye tubune kunum ginenŋ hatidok kameheyemiŋgiŋ. <sup>9</sup> Biyagoŋ hinek kuyoŋ, fowa wapum, miŋgembet komi, yabap moiniŋ heki'walaŋ talitimenhik wapum Sadaŋ, kwetkwet meeniŋ wele tubufit tiyemilak u tapmekulune kwetfoloŋ foguk. Ne tapmekula aŋeloŋiye wanaŋ yehitapmekulune fogiŋ.

<sup>10</sup> Unduŋ tiŋa kunum foloŋ kutikuti niŋ indinŋ mintaune nadigut, “Bepaŋnik'walaŋ tubuloda, eŋ saŋiniŋ, eŋ yodakale eŋ yodidime kwanai, eŋ Kilistonŋiŋ'walaŋ saŋiniŋ iŋakoŋ mintadakalelak. Notniye nadisukilitihiniŋ'walaŋ memik, helemahelemaŋ helebufa tuwot Bepaŋ namanda foloŋ mebihik yohauta tiŋa yenintifo tilak, uŋakoŋ hinek tapmetikukiŋ. <sup>11</sup> Adi yadi Domba Mihiniŋ'walaŋ naŋgat foloŋ ulodikilitiŋa Mede Momoŋ muntamuntanit mokit yohautagiŋ doktiŋa fafaŋegiŋ. Unduŋ tiŋila hatihatihik mu kahilegiŋ, adi kumuŋ titiŋdok munta mu tiŋa yodapmagiŋ. <sup>12</sup> Unduŋ doktiŋa kunum hogohogok eŋ uŋoŋ itowiŋdi nadifo tineenŋ. Ingoŋ kwet



dut imenḡwan wapum, hidi dedin tidemek, oye'! Yadi Kadakanin Molom agan hidi'walaḡkade fo-hamulak. Biyagon hinek kuyon, nainin agan dapmandok muninin tilak u kaḡ kwihita kisan hinek tilakneḡ ala."

### *Fowadi tam memik timinḡuk*

<sup>13</sup> Kaḡ fowa adi kekekulune kwetfolon foon tam mihi nagikuk u memik timinḡuk. <sup>14</sup> Unduḡ tuluguk kaḡ tam u baḡi suwaye papaliyat mim-bune woleen momon kwet fiilen Bepaḡ ne tiulidokominḡukneḡ woon fowadok munta mokit hatidok kameu uguk. Tiḡa unḡon hatilune kadakoon katoilune gulet 3 eḡ fakinin tuguk. <sup>15</sup> Adi unduḡ tiḡa momolune fowa adi mindaḡ maḡin ginenin ime suwakulune foon ime bedi tuguk uyadi tam uku ulawoti unḡdok nadiḡa unduḡ tuguk. <sup>16</sup> Inḡon kwetdi tam ya-hehewe timiḡa, maḡin aḡ tubune fowadi ime suwakukuk hogohogok u unḡon fodapmaguk. <sup>17</sup> Unduḡ tubune fowa adi tamdok nadikwihitan metamḡiye widihiwene uguk. Biyagon hinek kuyon, Bepaḡ'walaḡ yodoko mede tagimneen Jesu wou yohautain adi udihidok uguk. <sup>18</sup> Woon imenḡwan wapum dinin kin folon fosuwaan yakuk.

## 13

### *Imenḡwan wapumnenin kale miknit labuguk*

<sup>1</sup> Kaḡ yakaluwene imenḡwannenin kale moinin miknit ninḡi labuguk. Adi yadi mebi 7 eḡ kelev 10, ala kelev indigon tuwot mapme kulun 10 ikin. Mebi folon adi wohiye youkudip tiginḡi

haliuginj. Wohiye wendiniņ mebi adi Bepaņ nintifo tiņa nimpekit tiginj. <sup>2</sup> Kaņ Kale Moiniņ miknit kagut adi'walaņ folonamandapņiņ adi mundi moiņ wapum nabuņoņ, kayoņ adi kale bea kayoņ nabuņoņ, eņ maņiņ adi laion maņiņ undiniņ. Kaņ Fowadi ne'walaņ fafaņeņiņ, eņ mapme popņiņ, eņ saņiniņ wapum hinek mindapmaguk. <sup>3</sup> Kale wondiniņ mebi niņ youlukumun tiginj diniņ wedebitnit nabuņoņ kagut. U wedeņiņ gilakaune kotigoņ kedebaguk. Unduņ doktiņa meeniņ kwetkwet kagitegitekeņ adut hinek hatiginj. <sup>4</sup> Tiņa unduņoņ Fowa adi kale u saņiniņ miņguk doktiņa, meeniņ kwetkwet Fowa mohinek niutumbagiņ eņ kale maņ nintiņalooņ niutumbaāņ yogiņ, "Kale adi dabuņoņ nediyeņ hatilak. Eņ nediyeņ maņoņ timimbaak?"

<sup>5</sup> Tiņa sigitiņalo mede eņ medehaki yodok nindapmaguk. Tiņa muyakip 42 kwanainiņ hati titiņdok nai timiņguk. <sup>6</sup> Unduņ tiņa Bepaņ ne, eņ yolikweli, eņ wou wapum, eņ kunum foloņ itowiinj wanakaņ hogohogok medehaki yeniņa kisaņ yeniņkadaka hatiluguk. <sup>7</sup> Tiņa Bepaņ'walaņ metamņiye titiņhik didimehi mik-kwadi tiyemiņa yehitiņafo titiņdok nindapmaņit. Tiņa kwetkwet meeniņ folonamandaphik be mede waliniņhik mebimebi wanakaņ me bombonņi tiyemdok saņiniņ miņit. <sup>8</sup> Kaņ kwetfoloņ meeniņ hogohogokdi, adi niutumbagiņ. Meeniņ wohiye Domba Mihiniņ'walaņ hatihati diniņ pepa gineņ mu youliņit adi hogohogok kuyeņ kale u niutumbaneēņ. Domba Mihiniņ yoņ adi koomkwaha kwet mu mintagukneņgoņ Bepaņdi uluku-

muneen yodapmaguk. <sup>9</sup> Maginitdi mede i nadiwek.

<sup>10</sup> “Nebek nin adi yot fafañeniñdok gigit tuguk adi yot fafañeniñ gineñ fowaak. Eñ nebek nin adi miknoñdi youlukumundok gigit tuguk adi miknoñdi youlukumundok.”

Biyagon hinek kuyon, Bepañ’walañ metam didimehi hidi nai unañiñ nadisukilitihik honefafañeñ gigine tiña hatineen.

*Kwet maaneñniñ kale niñ labuguk*

<sup>11</sup> Kañ kwet maaneñniñ kale moiniñ miknit niñ labune kagut. Adi yadi dompa mihiniñ nabugon keleuñiñ muniñon eñ tungumuñ. Ingon medeñiñ adi fowa nabugon wapum toguk.

<sup>12</sup> Kañ kale moiniñ miknit wendi kale timen labuguk’walañ namanda folon hatiñila adi’walañ sañiniñ folon kwanai tuluguk. Tiña metam hogohogok kwetfolon hatigin yeningigineune kale timen wedewai tiña gilakaguk adi mulelem timiñiñ.

<sup>13</sup> Kañ adi yadi unduñ tiña kudi wapuhi fee tuguk, tiña yobune kwetkwet meeniñ namandahik folon kunum gineniñ kudup foguk.

<sup>14</sup> Biyagon hinek kuyon, adi kudi undiniñku titiñdok nadimiñit doktiña kale timen labuguk adi’walañ wou folon tiñila kwetkwet meeniñ hatiñ wele tubufit tiyemguk. Tiña undugon yenimbune kale wedewai tiña gilakaguk adi’walañ welewele tutumbagin.

<sup>15</sup> U tutumbaañ kambiyalune yatune kale moiniñdi mindañ labuguk aditok sañiniñ miñiñ doktiña munabut fedidahimimbune kaikañ medemedede toguk. Unduñ tiña yobune

meenij aditok mulelem mu timingij heki yadi udi hikumun tigin. <sup>16</sup> Tina meenij lolonit be fofonit, bombonhinit, be hambeep, bombongi be tipilapilaye-me, meenij hogohogok wana yenimbune kohohik didimenij folon be demehik folon fek kamedapmagin. <sup>17</sup> Undun tina kale dinij fek mu mongo hatigin adi yadi nemek kibikibi titindok be tuwatuwa titindok kamehep tiyemgin. Fek won adi kale'wala wou be wou dinij kunakunat. <sup>18</sup> Nadinadi fulingon inon hatak. Meenij nin adi nadinadi nenobu halimiluwek kan kale kunakunatnij dinij mebi tubumintawaak. Kunakunat won adi kwetfolon me nin'wala kunakunat. Kunakunat uyadi indin 666.

## 14

*Dompa Mihini en kayonbopniye adi Saiyon kweboboe folon yakin*

<sup>1</sup> Nu Saiyon kweboboe folon (Bepan'wala kweboboe) koti diween kawene Dompa Mihini ungon yakuk. Tina meenij kunakunathik 144 tausendi adut wana yakin. Demehik folon adi ne'wala wou en Beu'wala wou youkin. <sup>2</sup> Undun hogok be yo nadinen! Kunum folonij gigilit wapum nadigut, uyadi ime hambem kuma ginen fon tolak undinij, be munkulap wapum tolak undinij. Ingon mede gigilit u nadiwene baiwagim nabugon tuguk. En meenij feedi baiwagim ulune tolak undinij nadigut. <sup>3</sup> Adi yadi mapme pop heben folon en nemek hatihatinit 4,

en talitimen heki'walaŋ hebehik foloŋ kap gitip-muŋ niŋ togiŋ. Kap uyadi meeniŋ nolidi tona-didok tuwot mu tuguk. Adi meeniŋ 144 tausen yehidaneen yehituwaan netok yabukahileguk, adi hogokdi nadidok tuwolit tuguk. <sup>4</sup> Biyagoŋ kuyoŋ, adi yadi tamwoi dut titiŋ hogoli mu tiŋa welehik walaŋiŋ hatigiŋ. Adi hinek kuyen Domba Mihiniŋdi hatilu katuwali kelehatigiŋ. Biyagoŋ hinek, adi yadi kwetfoloŋ metam gineniŋ yehituwanit, ala wendigoŋ nanaŋe kwanai kobut ginen timentimeniŋ kitalak u Bepaŋdok siloŋ tiyam unduŋ nabugoŋ, meeniŋ kwetkwet hatiŋ unŋaniŋ Bepaŋ en Domba Mihiniŋdok timen-timeniŋ yehidaneen yehituwaan yanagikuk. <sup>5</sup> Tiŋa adi'walaŋ mahikdi yalaŋ mede nemu yogiŋ, adi yadi yomhinit mokit.

*Aŋelo lufomkulitniŋ'walaŋ kutikuti mintaguk*

<sup>6</sup> Kaŋ kawene Aŋelo niŋ foloniŋ hamap ginen hinek gwaŋ woleen uguk. Adi yadi meeniŋ kwetkwet, folonamandaphik en mede waliniŋhik unŋoniŋ unŋoniŋ aditok Bepaŋ'walaŋ Mede Momooŋ moŋgoyem hatiguk. <sup>7</sup> Adi wapum hinek kutiŋa indiŋ yoguk, “Hidi yadi Bepaŋ nadimimbune loune gikiŋgoŋ timiyaneen. Biyagoŋ kuyoŋ, kibikoŋ wobuwobu naiŋiŋ dulalak. Kwetkunum, imengwaŋ wapum, en ime dawi yehitubu-mintaguk adi wou nintilooŋ niutumba tiyaneen.”

<sup>8</sup> Adi unduŋ kutiŋa ulune aŋelo niŋdibo min-dan buŋa indiŋ kutiguk, “Babilon yokwet wapum pupuhenelak. Agaŋ pupuhene hinaka tilak!

Biyagon kuyon, yohi wahi unghidi meenin kwetk-wet siloda kadakanin u wain ime miknit nabugon yemtoiyagin.”

<sup>9</sup> Undun kutina ulune anelo kunakunat 3-di bunja mede wapum yohautaan indin yoguk, “Nebek nin adi Kale Moinin ne-be, be welewelenin mulelem timimbaak, en demei folon be kohon folon adi’walañ fek mongo hatibaak adi kibikon malabumun indin mintamimbaak.

<sup>10</sup> Adi yadi Bepanñi kwihitanin dinin wain ime miknit hinek, ime hinek dut mu minobunjit, u ne’walañ kulufe gineñ ulimimbune naan kudup fafañenin kawade hakatdi (salfa) ha-dalakneñ foon daune folofigita dapmandapmanñit mokit nadiwaak. Wonñ adi anelo ungonin en Domba Mihinin adi’walañ hebehik folon-ku mintawaak on.

<sup>11</sup> Kañ kudupdi meenin undihi yehidahiune wendinin kudup mupmukdi youdihinit loluwaak. Ala meenin Kale Moinin miknit, en welewelenin mulelem timinjinñ adi be, be wou dinin fek kame hatiginñ adi wanañ folofigitadi mu biyabaak. Undun doktina ikulema mu tina helebufa tuwolit folofigita tomboyoutnit hinek nadi hatiya-neen.”

<sup>12</sup> Biyagon hinek, nai unaningon meenin nadisukilitihinitdi Bepan’walañ yodoko mede takalina Jesu’walañ Mede Moomon u munta mu tina kame hatiinñ adi saninin tubumintaanñ fafañ tina folofigita naditaune malabumun yendi mu yehitubu-gweheyewaak.

*Bepan’walañ mede kamehatina kumiin  
adi’walañ mede*

13 Kaŋ kunum gineniŋ mede niŋ indinŋ mintaune nadigut, “Du mede i youleŋ. Nai indidegoŋ tububihila, Wapum’walaŋkade ulodiŋa kumuneenŋ adi Bepaŋdi kahaŋ tiyemulak doktiŋa welemomooŋ nadiyaneenŋ.” Unŋoniŋ Munabulidi indinŋ tomboyoula yoguk, “Biyagoŋ, adi kwanai tigulugulune u dilitele kameŋa ikuleenŋ welemomooŋ nadiinŋ. Ala nehi ulune titiŋ eŋ hatihatihikdi wanaŋ ulak.”

*Kwetfoloŋ meeniŋ nadisukilitihiniŋ hatiinŋ yanagitdok nindidimeguk*

14 Nu kotigoŋ wahiŋkade diwewene loune pilap hinek mulukwaŋ fafau niŋ mintaune kagut. Tiŋa mulukwaŋ foloniŋ meeniŋ niŋ ilune kagut. Adi yadi folonamandapŋiŋ adi Me Kobumuŋ nabugoŋ. Mebi foloŋ mapme kulunŋ goldi tutumbagiŋ mokoŋa ikuk eŋ kohoŋdi tahak maŋiŋ mikit hinek kame ikuk. <sup>15</sup> U yakaluwene Silonyotneniŋ aŋelo niŋdi fooŋ me mulukwaŋ foloniŋ ikuk aditok indinŋ kutiniŋguk, “Du tahakgedi moŋgotna boi tibeŋ. Biyagoŋ hinek, kwetfoloŋ kwanai hatak agaŋ tuwot ki-taŋ gilakalak doktiŋa moŋgoboi titiŋdok nai tilak.” <sup>16</sup> Unduŋ yobune mulukwaŋ foloŋ ikuk adi tahakŋiŋdi kwetfoloŋ kula uliŋjila moŋgotna tuguk.

*Kadakaninŋ titiŋ kibikoŋ tiyemdok nindidimeguk*

<sup>17</sup> Unduŋ tulune aŋelo niŋdibo kunum ginenŋ Silonyotneniŋ labuguk. Adi maŋ undugoŋ tahak maŋiŋ mikit hinek honeenŋ hatiguk. <sup>18</sup> Adi bulune

noliniņ nin siloņ hemihemiņ alta ikukneņkade uņandiņ buguk. Adi yadi kudup kadoko hatilakdi noliniņ tahak maņiņ mikit honeeņ hatiguk u indin kutiniņguk, “Biyagoņ hinek, du tahakge maņiņ mikit kwetkwet waingile agaņ kitaaņ gimindaiņ ale filodokokut!”<sup>19</sup> Unduņ yobune aņelo noliniņdi tahak kulune wain folooņ gilenit filopmadidapmaune magiņ. Kaņ moņgola Bepaņ’walaņ kwihitaņiņ diniņ ufilifiliye kabot wapum maaneņ kulune fotelegiņ.<sup>20</sup> Unduņ tiņa yokwet diniņ gimbahaņ gagayeņ yalifilifiliyeune naņgat gibitaņ labuguk. Labugelabuge imeņgwaņ wapum tuguk. Uyadi kale wosi heki geņhik foloņ labu wehemilek wondok tuwolit tuguk. Tiņa kwet kweheyeņiņiņ 3 handelet kilomita wendok tuwot tokiņa hakuk.

## 15

### *Meeniņ kwetkwet bopneņ Bepaņ kap tomiņgiņ*

<sup>1</sup> Kaņ kunum foloņ kudi muntaņ hinek nin kagut. Aņelo heki 7-di meeniņ kumuņ fotabadok nemek mikhinit 7 moņgo yakiņ. Nemek u mindaņ mintaune Bepaņ’walaņ kwihita diniņ folooņ mintadapmaņdok yonjit.<sup>2</sup> Tiņa nin indin kagut, uyadi imeņgwaņ wapum nin galas nabugoņ kudupmebem dut miņobuņit. Ala meeniņ Kale Moiniņ’walaņ mede, eņ weleweleniņ, eņ kunnakunatniņ u fafaņe tiņa kelekufakiņ, adikuyeņ imeņgwaņ wapum galas nabugoņ adi’walaņ gagayeņ, Bepaņdi baiwagim yemguk beņa yalune yabugut.<sup>3</sup> Adi Bepaņ’walaņ tipilapilaye-meņiņ



Moses'walaŋ eŋ Domba Mihiniŋ'walaŋ kap indin yonŋa togin,

“O Wapum Bepaŋ, Saŋiniŋ Molom, du kwanai lolonŋit eŋ magaligalinit tilaŋ. Meeniŋ mohok kwetkwet hatitawiinŋ adi'walaŋ Mapme Lolonŋit, du'walaŋ talik didimeniŋ eŋ foloon hinek. <sup>4</sup> Wapum, du nediyenŋ gikiŋŋon mu tigambaak? Eŋ nediyenŋ wohoge mu youtumbawaak? Du kubuŋonŋi unŋoninŋ hinek. Du tubudidime kwanai didimeniŋŋon tubune mebi dakalelak. Unduŋ doktiŋa meeniŋ mohok du'walaŋkade buŋa mulelem tigamuyaneen.”

### *Aŋelo 7 maliŋhinit mintagiŋ*

<sup>5</sup> Kaŋ nu daune diwenŋ kawene kunum folon Silonŋyot yeme dilitomuŋguk. Yot wonŋ adi yofolok mede diniŋ yot. <sup>6</sup> Dilitombune aŋelo 7 meeniŋ kumuŋ fotabadok nemek mikhinit 7 moŋgola hatigiŋ adi Silonŋyotneniŋ labugiŋ. Adi yadi dahi-dahi walaniŋ fafau dahiŋa hatigiŋ, eŋ siyohik folon kiyegelep goldi tinŋit wendi youkilitigiŋ. <sup>7</sup> Kaŋ nemek hatihatihinit 4 yakiniŋ adi'walaaniŋ niŋdi aŋelo 7 maliŋ 7 goldi tutumbaŋit u molo-molom yemguk. Maliŋ maanenŋ adi Bepaŋ hati-hati fafaŋeniŋ molom diniŋ kwihitadi tokiguk. <sup>8</sup> Kaŋ Silonŋyot maanenŋ Bepaŋ hautaŋiŋ diniŋ eŋ saŋiniŋniŋ diniŋ mupmukdi labuŋa tokidap-maguk. Kaŋ aŋelo 7 heki'walaŋ meeniŋ kumuŋ fotabadok nemek mikhinit 7 mu tubumintadap-magiŋ doktiŋa nebek niŋdi Silonŋyotnenŋ lolonŋdok tuwot mu tuguk.

# 16

## *Bepañ'walañ kwihita maliñ 7*

<sup>1</sup> Kañ Silonyotneniñ kutikuti wapum niñ indin labune nadigut. Uyadi añelo 7 indin yeniñguk. “Hidi wooñ maliñ 7 kwatneune Bepañ'walañ kwihitadi kwetfoloñ fowek.” <sup>2</sup> Kañ añelo kunakunat 1-di wooñ maliñ gineniñ nemek kwatneune kwetfoloñ foguk. Foune meeniñ Kale Moiniñ'walañ wou kamehatigiñ eñ weleweleniñ mulelem timiñgiñ adi wede mebimebi kadakahi hinekdi foloohik foloñ mintayemgiñ.

<sup>3</sup> Kañ añelo kunakunat 2-dibo maliñniñ gineniñ nemek kwatneune imenñgwañ wapum gineñ foguk. Foune imenñgwañdi nañgat eñ meniñgitnit nabugoñ tuguk. Unduñ tubune imenñgwañ wapum gineñ nemenemek hatihatihit kumuñdapmagiñ.

<sup>4</sup> Kañ añelo kunakunat 3 adibo maliñniñ gineniñ nemek kwatneune ime dawi eñ ime miñ gineñ foune nañgat tubudapmaguk. <sup>5</sup> Unduñ tubune añelo ime kadoko kamenitdi indin yobu nadigut,

“Didimeniñ eñ Uñgoniñ Molom, hatiguñdi hatilañ. Kibi toboniñ yodapmañ medege didimeniñgoñ yolañ. <sup>6</sup> Adi yadi kayoñbopgeye eñ polofetgeye'walañ nañgat tubukadakagiñ doktiña kibibo nañgat ingoñ yemtoiune naiñ. Unduñ tiyembune tuwot hinek tilak.”

<sup>7</sup> Kañ altadi mede indin yobu nadigut, “U biyagoñ. Wapum Bepañ, Sañiniñ Molom, kibi toboniñ yodapmañ medege adi biyagoñ eñ didimeniñ hinek.”

<sup>8</sup> Kañ anjelo kunakunat 4-dibo maliññiñ gineniñ nemek kwatneune mele gineniñ foguk. Uñoñ foune mele diniñ kudup gibitan daañ meeniñ kisañ yehidaguk. <sup>9</sup> Meeniñ adi mele kudutñiñdi yehidaune, Bepañdi yobune nemek miknit unduñ mintaguk adi'walañ wou niñkadakagiñ. Tiña welehik mu tubutakaleeñ Bepañ mu nintilogiñ.

<sup>10</sup> Kañ anjelo kunakunat 5-dibo maliññiñ gineniñ nemek Kale Moiniñ'walañ mapme popñiñ gineniñ kwatneune foguk. Kwatneune foune yolik-weli mambip tubudapmaguk. Unduñ tubune meeniñ adi folofigita fuliñgoñ hinek nadiña mahik sikiliti tigiñ. <sup>11</sup> Untiñila folofigita eñ wedehik doktiña Bepañ kunumneniñ nimpekit tiña nisuwambat tigiñ. Unduñ tiña welehik mu tubutakaleñ, titiñ be hatihatihik kadakanin u mu wabigiñ.

<sup>12</sup> Kañ anjelo kunakunat 6 adibo maliññiñ gineniñ nemek kwatneune Yufeletis ime wapum gineniñ foguk. Foune ime nañgakuk. Uyadi talik mintaune mapme mele labulabunenñkadehidi bubuñdok unduñ tuguk. <sup>13</sup> Kañ nu yali yabuluwene fowa'walañ mañiñ gineniñ eñ Kale Moiniñ mañiñ gineniñ, eñ polofet yalayalañ mañiñ gineniñ yabap moihi lufomkulitniñ, hawom nabugoñ labugiñ. <sup>14</sup> Adi yadi yabap foloñ. Kudi wapum titiñdok sañiniñ hayemilak. Adikuyeñ mapme kwetkwet hatiññ yenhohokeneune Bepañ Sañiniñ Molom'walañ nai wapum foloñ mik titiñdok meyout tiña buña mindobu tineñ. <sup>15</sup> "Indiñ hinek nadineñ! Nu yadi kubome nabugoñ kaka

busuwawaat. Ale tiyaugene nebek ninj adi hambiyek tinj mekawaaknej, ala nadinjale haulenjin tinahukutdok tiulidokoon hatiluwaak. Unduj tibaak adi Bepanj nadifo tinj kahan timimbaak.”

<sup>16</sup> Toboninj indinj, yabap moininj heki adi kwet ninj wou Judahi'walanj mede folonj Amagedon yoginj unjonj mapme yehibopnedapmaginj.

<sup>17</sup> Unduj tulune anjelo kunakunat 7 adibo malinjnin gineninj nemek hamap folonj kwatneune foguk. Kanj Silonyotnej mapme pop ikuknejkade mede ninj indinj foguk, “Aganj tuwot tilak.”

<sup>18</sup> Unduj yolune filimpit, enj munjulap, enj manjnguhut, enj kenim wapum hinek tuguk. Meeninj koomkwaha hatitalabuginnej undininj nemu tuguk.

<sup>19</sup> Unduj tubune yokwet wapum tawaanj lufomkulitninj tuguk. Enj meeninj kwetkwet hatinj adi'walanj yokwet wapuhi pupuhenedapmaguk. Enj Babilon yokwet mebi'walanj molohiye adi yadi Bepanj ne titinj hik yabunadinj nadikwihitayeminja wain ime fafaneninj miknit yeminguk.

<sup>20</sup> Tinj nai unjanjngonj kwet kambanjgit enj kweboboe wananj liwedapmaginj. <sup>21</sup> Enj kunum gineninj gwi wapum ukuk, gwi folonj adi sububa tinj kawade bigim nabugonj mintanj,\* meeninj udihiune folofigita nadinj Bepanj nimpekit tinj nisuwambat tiginj. Gwi sifo wapum hinek ula fana kisanj tiyemguk.

## 17

### *Tam ninj kale gimininj folonj ikuk*

\* **16:21:** Malabumunj hik adi 45 kilo.

<sup>1</sup> Kaŋ aŋelo 7 maliŋ 7 beyaugini adi'walaaniŋ niŋdi nu'walaŋkade buŋa indiŋ naniŋguk. “Kefifile tam hogoli hinek wounit ime wapuhi foloŋ itoulak adi kibikoŋ mintamimbaak u ganimbe kawen. <sup>2</sup> Yakalaŋ! mapme kwetkwet hatiŋ adi yadi adut kefile tigiŋ, eŋ meeniŋ kwetkwet hatiŋ adi adi'walaaniŋ siloda diniŋ wain ime naaŋ nadibubuye tigiŋ.” <sup>3</sup> Unduŋ nanimbune Uŋgoniŋ Munabulidi saŋiniŋnit hinek fotokina-muŋa kwet fiŋeŋ nanagila uguk. Kaŋ uŋoŋ tam niŋ kagut, adi kale moiniŋ niŋ giminiŋ foloŋ ikuk. Kale foloŋ foloŋ wou fee youkudip tigiŋdi tokiŋa hakiŋ. Wou wendiniŋ mebi adi Bepaŋ nintifo tiŋa nimpekit tigiŋ. Kale wondiniŋ mebi 7 eŋ keŋe 10. <sup>4</sup> Kaŋ tam weŋ adi dahidahi giminiŋ eŋ timbitimbit kudi-di dahiŋa hatiguk, eŋ tinahukutiŋ adi gol, eŋ kawade kudinŋ eŋ komkom filimpitpitnit tuwaŋiŋ loloniŋ, undihidi tinahukula hatiguk. Tiŋa kohonŋdi maliŋ niŋ goldi tutumbagiŋ honeeŋ yakuk wondiniŋ maaneŋ adi siloda kadakaniŋ diniŋ nemek dagidagiyeŋ, munduŋ kadakaniŋ, undiniŋdi fotokiguk. <sup>5</sup> Demei foloŋ wou hebiŋiŋ indiŋ youkiŋ hakuk, “Babilon yot mebi wapum, siloda tiŋa kefile titiŋ diniŋ miŋ na iŋakoŋ. Wendigoŋ kwet tubumadimadike tilak.” <sup>6</sup> Unduŋ tiŋa tam adi metam nadisukilitiniŋ eŋ Jesu wou yohautagiŋ adi'walaŋ naŋgat nage nage nadibubuye tubune kagut. U kaŋ boho kisaŋ tugut.

*Kale mebi 7 wondiniŋ mede*

<sup>7</sup> Kaŋ aŋelodibo indiŋ yoŋa naninadiguk, “Maŋgoŋde boho kisaŋ tilaŋ? Nu tam yeŋ'walaŋ

mebi ganimbe nadiwen. En kale mebiñ 7 en kelevu 10 nitdi hekilak adi'walañ mebi hebiñ ganindakalewe nadiwen. <sup>8</sup> Du kale moiniñ kañañ uyadi koomkwaha hatiguk, nai indidegoñ mu hatilak, kaugon adigili koñ fuliñmamañ gineniñ labuñ kumuliwe kwetneñ fowaak. Kañ koomkwaha hatiguk, nai indide mu hatilak, hatigene udaneñ baak u meeniñ kwetfoloñ hatiiñdi kañ yobedibediye tineñ. Wohiye kwet tububihila mintaguk nai uñaniñgoñ hatihati fafañeniñ diniñ pepa foloñ mu youliñit, meeniñ adikuyeñ unduñ tineñ.

<sup>9</sup> “Yoñ adi nadisu-fuliñgoñ tiña mebi nadidok tilak. Mebi 7 adi kweboboe 7, tamdi wihila itak ukuyoñ. <sup>10</sup> Kañ kweboboe 7 wondi mapme 7. Ala mapme 5 agañ mintañ hatibune dapmaguk. Niñ kobuk hatilak, en kubugoñ niñ kougoñ hatige mintawaak. Adi yadi mintañ nai muniniñ-kabe hatidok niñit. <sup>11</sup> Kale koomkwaha hatiguk, nai indinde mu hatilak, adi mapme 7 hanjalañ yatuwat tiñ adi'walañ nohik, ala adut tomboyoulune kunakunat 8 tibaak. Tiña kumuliwe kwetneñ fowaak.”

### *Kale kelevu 10 wendiniñ mede*

<sup>12</sup> “Kale kelevu 10 yabuñañ adi mañ mapme 10 kougoñ mintañ kwanai tineñ, iñgoñ adi yadi kwanaihik tububihila kale moiniñdut nai muniniñ-kabe tineñ. <sup>13</sup> Adi nadisuhik kiulune kubugoñ tubune saniniñhik en wohikgigit kale moiniñdok miña tipilapilaye kwanai gigne tiña tineñ. <sup>14</sup> Unduñ tiña Domba Mihiniñdut mindobu tineñ. Iñgoñ Domba Mi-

hiniñdi mapme heki'walañ Mapme Wapum eñ loloñnit heki'walañ Loloñnit doktiña adi fafane tiña widihiwaak. Biyagoñ hinek kuyoñ, metam adut wooñ mik tineeñ adi yadi Domba Mi-hiniñdi yabukahileen yahaneguk doktiña mede didimeneñoñ nadikilitiña kelegiñ.”

### *Tam'walañ mede*

<sup>15</sup> Unduñ yoña tomboyoula indin naninguk, “Kefifile tam adi ime wapuhi wendok foloñ ilune kañañ, ime uyadi meeniñ bop mohok, folonamandap eñ mede waliniñ mebimebi hatitawiin. <sup>16</sup> Tiña kelevu 10 yabuñañ, adibe, be kale adi wanañ kefifile tam kakwihitan utubukadaka-hinakan dahidahi bombonñin lom moñgodapmaan, gomñin naañ kitili eñ gitnem kudup gineñ heneeñ. <sup>17</sup> Tiña u hogok mu tineeñ, Bepañdi welehik tubulodaune adi medeñin takaliña welekubugoñ tubudapmaan kale tipilapilaye timineeñ. Biyagoñ kuyoñ, unduñ timiña hatilune Bepañ'walañ mede foloñnit tubudapmawaak. <sup>18</sup> Tiña tam kañañ woñ adi yokwet wapum. Ala adi'walañ mapmedi kwetkwet diniñ mapme hogohogok yabudokoune tipilapilaye timindok sañiniñ halimilak.”

## 18

### *Babilon yokwet wiyapupuhenedok mede*

<sup>1</sup> Anelodi unduñ yodapmaune nu anelo niñ kunum gineniñ foune kagut. Adi yadi loloñnit hinek tiña hautañinñdi kwet tubuhautadapmaguk.

<sup>2</sup> Adi wapum hinek kutiña indin yoguk,

“Babilon yokwet mebi wiyapupuhenelak! Wiyadapmanj hinek tilak. Adi yabap kadakahi heki’walañ yohikwehik tilak. Yotmuluñ uyadi gintaluñ eñ bagi nemek madimadikehi naindi itowiin. <sup>3</sup> Meeniñ kwetkwet buña keffileniñ diniñ wain ime fafañeniñ nayagiñ. Mapme kwetkwet buña adut keffile tiyagiñ. Biyagoñ kuyoñ, Babilonhidi titiñ kadakanin mekanit mokit kisañ tigiñ doktiña kwetkwet bombongi me wapuhi buña bombonj tuwadok boiyembune tuwaune muneen bombonj loloñnit tubumintagiñ. Unduñ doktiña wiyapupuhenelak.”

*Yot mebi uyadi Bepañ’walañ mede doktiña ula heheñdok*

<sup>4</sup> Kañ kunum gineniñ kutikuti indin founé nadigut. “Manemaneye, hidi yokwet u bikabuña momoneñ. Uñoñ hatiña adi’walañ kadakaninñin tubulodaneeneñ. Tiña undugoñ nemek miknitdi hidi-foloñ lowaakneñ doktiña hanilat. <sup>5</sup> Yokwet wendi kadakanin kainiñ bebeli tiña lolu lolu kunum wehemit tilak. Unduñ doktiña Bepañ adi yomñin u kañ nadidapmaan yolak. <sup>6</sup> Unduñ doktiña kibi dedin tihamguk wendok tuwolit timineen, tiñila kibi tiñalooñ kiulaña wapumgoñ timineen. Kibikoñ adi ne’walañ maliñ gineñ ungoñ tiñaloloyen mineen. <sup>7</sup> Sigitinjaló tiña kap miyemiye tiña tonadifo tihatiluguk wendok tuwolit utubufigitaneen. Unduñ tiña welebulanin kisañ tubumintamineen. Adi netok nadi-une loloñnit tubune indin yolak. Na yadi tam loloñnit, nu tam kahat moñ, nu yadi nadifo foloñ



hogok hatiluwaat. <sup>8</sup> Unduñ yolak doktiña meleanai kubugoñ foloñ hogok adi'walañkade nemek miknit mintamimbaak: kumuñ, kobulabulaye, eñ map wapum. Unduñ tiña kudup gineñ daliwe-waak. Biyagoñ kuyoñ, Wapum Bepañ adi Sañiniñ Molomdi yomñiñ undugoñ wobumindapmalak.”

*Kwetkwet me bombonji eñ adut menot moon tiginđi kobulabulaye timineen*

<sup>9</sup> Unduñ yoña indin tomboyoula yoguk. “Kañ kwetkwet mapme buña adut kefile tigin eñ hinamuni tiña kap miyemiye tiyagin, adi yadi kudup mupmukñiñ loune kañ bulaningon wapum nadiña kobulabulaye tineen. <sup>10</sup> Tiña kwatnangon yali nemek mulapmuñ mintamimbaak u kañ munta kisañ tineen. Tiña indin yoneen, ‘Yakeee! Yakeee! yot mebi! Babilon, du yokwet fafañeniñ ingon on, titiñ kadakaninge dinin kibikon nai muningon-kabe gineñ ingon pilap hinek busuwagamulak!’

<sup>11</sup> “Eñ yokwetkwet me bombonji heki adut menot tiginđi indin yoneen, ‘Nediyen bombonnik tuwaneen?’ Unduñ yoña kobulabulaye tineen. <sup>12</sup> Bombon kibikibi tigin u nemek injolak, gol eñ silwa, eñ fukut tuwaning loloñnit, eñ haule kudikudihinit hogohogok, fafau eñ giminiñ, yañamuhi eñ bulubuluyehi, eñ bem munduñhinitdi nemek tutumbagin, eñ elefan kelehikdi nemek tutumbagin, eñ bem momohi tuwahik loloñnit hinekdi, eñ aindi, eñ kapadi, eñ kawade kudikudihinitdi nemenemek tutumbanit. Bombon undihi tuwadok boiune tuwagin.

<sup>13</sup> Tiña bombon noli indihi: sinamon gitnem, eñ

subat galik, en hemundumundune kwam momoon, en haguwo mundun momoon\*, en wahu mundun momoon, en wain ime, gip, n̄aso, en subat, mantam, tin̄a dompa, makau, wosi, kalis, en meenin̄ tipilapilaye tuwanit mokit titin̄dok maan̄gon̄ tuwadok yapmeune tuwagin̄.

<sup>14</sup> “Kaṅ yon̄ adi bombon̄ge mohok yabukwekeweṅe hatigin̄ u agan̄ dapmahinakaguk. Tin̄a ime wodisilaṅsilan̄ge silidaguk, en tinahukut kinononge fikuk, dedin̄ tin̄a kotigon̄ mintagam-baak.

<sup>15</sup> “Kaṅ nolin̄iye nemek undihidi kibikibi tin̄a muneen̄ bombon̄ wapumnit tigin̄ adi kwatnan̄gon̄ yali nemek malabumun̄ folofigitanit mintamimbaak u kaṅ muntaan̄ kobulabulaye tin̄a indin̄ kutinineen̄, <sup>16</sup> ‘Yakeee, yakeee, yot mebi! Du dahidahige kudikudinitdi dahidondopnegun̄, en tinahukut mebimebi tuwahik lolon̄nit wendin̄in̄ maan̄en̄ itoulugun̄! <sup>17</sup> Yadi bombon̄ mohokge nai munin̄gon̄-kabe fana kaka tin̄it.’

“Tin̄a undugon̄ muwage molohiye, en me muwage folon̄ kwanai tin̄ila imen̄gwan̄ wapum folon̄ un̄at bun̄at tiin̄, en metam muwage folon̄ yawagin̄, adi maan̄ kweetnin̄ yali <sup>18</sup> kudup mupmuknin̄ loune kaṅ makat koyone tin̄a indin̄ yoneen̄, ‘Bulanin̄gon̄, yokwet wapum indinin̄gon̄ noli din̄gon̄ itak?’ <sup>19</sup> Undun̄ yon̄a kwam gomun̄a kobulabulaye en yomalabuda tin̄a indin̄ yoneen̄, ‘Yakeee, yakeee, yot mebi! du kwanai tugun̄ doktin̄a muwage molohiye muneen̄ bombon̄nit

---

\* **18:13:** Wou “mel” yoin̄.”

tigin. Kan yon adi gehingehin hinek yokwet kwampupu mintalak.’

<sup>20</sup> “Kunumnehi en Bepan’walañ metam, aposel en polofet heki, hidi yadi welemomoon nadiña nadifo tineen. Biyagon kuyon, yot mebi wendi hiditok yom tihamguk wondok kibikon Bepandi tubudapmalak.”

*Yokwet mebi u kwet bilebile en kwampupu hogok hahatdok yoguk*

<sup>21</sup> Mede unduñ mintaune aņelo sanjiniñnit niñdi kawade bigim wapum tubupilali imenğwan wapum ginen kulune foguk. Foune indin yoguk,

“Babilon yokwet mebi undigon waanin kuhebidok, kan liwedapman tibaak. <sup>22</sup> Kan baiwagim toto, gita uut bop adi’walañ mahik gigit u du’walaanin kotigon mu mintawaak en kohohikdi nemenemek momoon tutumbain u du’walañkade wabidapman tibaak. Kan uñon kwanai titotitonit mokit kwet bilebile halaak. <sup>23</sup> Du’walañkade kamañ kotigon mu dahautawaak, en metam hekimalam kobut tiña mede yogege undugon mu mintawaak. Du’walañ me bombonhinitdi kwetkwet me wohik wapumnit hatitaugin en du’walañ tubuhidi meenin kwetkwet welelik tubufikuk, <sup>24</sup> tiña polofet en meenin nadisukilitihinit en kwetkwet meenin udihiñit adi’walañ nañgat dinin yom u du’walañkade hatak doktiña unduñ tigamdok.”

## 19

*Kunum folon tonadifo mintaguk*

<sup>1</sup> Anjelodi mede unduŋ yodapmaune nu kunum gineŋ meeniŋ bop wapumdi mede haam toinŋ undiniŋ nadigut. Kaŋ adi wanakaŋ hogohogok indinŋ toginŋ.

“Haleluya, Wapumnik niutumbanim! Tutumbanik eŋ wougigit hautanit eŋ saniniŋ wapum uyadi Bepaŋnik’walaŋkade hatak. <sup>2</sup> Adigonŋ yomdok kibikonŋ tubu-udaneyembune foloŋ tilak eŋ tuwot hinek tilak. Kefifile tam loloŋnit adi kwetkwet meeniŋ siloda talikŋinŋ yenindidimeeŋ yehitubu-kadakaguk adi’walaŋ yomŋinŋdok kibikonŋ timiŋguk. Unduŋ tiŋa Bepaŋdi metamŋiye’walaŋ naŋgat diniŋ yom diki hakuk u tubudapmaguk.”

<sup>3</sup> Unduŋ yoŋa kotigonŋ gicineeŋ toginŋ,

“Haleluya, yot mebi kudupdi daune adi’walaŋ kudigedi helemahelamaŋ youdihinit lowaak.”

<sup>4</sup> Kaŋ Bepaŋ adi ne’walaŋ mapme pop foloŋ ilune talitimeŋ 24 eŋ nemek hatihatihinit 4 adi foŋ duwokeneeŋ hali indinŋ yoŋa niutumbaginŋ,

“U Biyagoŋ! Haleluya! Wapumnik niutum-banim!”

<sup>5</sup> Unduŋ tulune mede niŋ mapme pop ikukneŋkade indinŋ buguk,

“Bepaŋ’walaŋ tipilapilaye-meniye, hidi wanaŋ niutum-baneŋ. Biyagoŋ kuyoŋ, loloŋnit be fofoŋnit, gikiŋgoŋ timiinŋ hogohogok hidi unduŋ tineŋ.”

*Dompa Mihiniŋ’walaŋ gulet momooŋ*

<sup>6</sup> Kaŋ nu tonadifo gigilit wapum koti nadigut. Uyadi imeham hambem kuma foloŋ foŋ tolak

nabugon, en munjulap nabugon nadiwe kutikuti indin mintaguk:

“Haleluya, Wapumnik niutumbanim! Wapum Bepanik, Sañiniñ Molom, adi yodidime en tubudidime kwanainiñ miñgon tububihitak. <sup>7</sup> Undun doktiña indi welemomoon nadiña niutumbanim. Domba Mihiniñ’walañ nadifo nai tilak en aditok gigit hatiinđi tiulidoko agañ tinjit. <sup>8</sup> Adi yadi dahidahi fafau, walañ hinek en holiholiñen tinahukula hatidok nadiyemiñit.”

(Wapum’walañ metamñiye, ne nadisukilitimiña titiñ didimeniñ tigiñ, wendigon dahidahihik tilak.)

<sup>9</sup> Kañ añelodi mede niñ indin naniñguk, “Du indin youleñ. ‘Domba Mihiniñ’walañ kohokukut diniñ tonadifo nai foloñ hinamuni gineñ nanane nanañdok yeniyehimanenjit, adi yadi Bepañdi kañ tiyembune welemomoon nadiñ.’” Undun yoña yoguk, “Biyagon kuyon, mede ganilat yon adi Bepañ’walañ mede foloon hinek.”

<sup>10</sup> Undun nanimbune nu mulelem timiña niutumbawit yo tugut kañ moñ naniña yoguk, “Undun mu tiben! Nu yadi tipilapilaye noke. En nokeye munta mu tiña Jesu’walañ medeniñ nadisukilitiña kamehatiñ, adi’walañ nohik. Du yadi Bepañ ne hogok niutumbawen! Jesu’walañ mede nadisukilitiña kamehatiñ uyadi Ungoniñ Munabuli’walañ kigili mede.”

### *Jondi Jesu en mikmenjiye yabuguk*

<sup>11</sup> Kunum dilitombune nu diween kawene wosi fafau niñ yadiweguk. Kañ signiñ foloñ ikuk adi’walañ wou adi “Mede biyagon molom.” En

wou noli adi, “Mede nadiguk tuwolit gweheye mu tiņa tilodapmaguk.” Adi yadi kibikonj wobuwobu enj mik adi didimeningonj hinek tubune tuwot tilak. <sup>12</sup> Dawiyat adi kudupmebem undihi, mebi folonj mapme kulonj fee ikinj. Tiņa wou youkudip tinjit uyadi ne kubugonj kunali nadilak. <sup>13</sup> Dahidahinjinj kweheyeninjinj ala nangat ginonj fulanjinj, tiņa adi’walaņ wou adi “Bepaņ’walaņ Maņinjinj Mede” yonjinj. <sup>14</sup> Adi ulune kunumnehi mikme mohomohok adi wosihiye fafau folonj ila mindaņ keleenj uteleginjinj. Dahidahihik adi fafau enj walahi hinek. <sup>15</sup> Maņinjinj ginaneņ adi miknonj mikit ninjinj labuguk, wendigonj meeninjinj hogohogok kwetkwet widihinja yehitubu-didimewaak. Unduņ tiņa tot fafaņeņ malinja hatinja yabudokowaak. Unduņ tinjila Bepaņ, Saņininjinj Molomdi’walaņ kwihita minjonj tubumintaanjinj kibi toboninbo yodapmanjinj kwanai tibaak. <sup>16</sup> Dahidahinjinjinj lekinjonj folonj enj baanjinj folonj wou indinjinj youkinjinj hatak, “Mapme heki’walaņ Mapme Wapum, enjinj lolonjinj heki’walaņ Lolonjinj.”

*Jesu’walaņ maņinjinj gineneņ mededi memiknjiye widihidapmawaak*

<sup>17</sup> Kaņ nu daune diweņ aņelo ninjinj mele folonj yalune kagut. Adi unjonj yali bagi hogohogok hamap ginonj wole hatiginjinj wapum hinek kutyeneņja yoguk, “Bepaņ’walaņ hinamuni wapum mintalak doktinja buņa bopnedapmanenjinj. <sup>18</sup> Tiņa mapme heki’walaņ foloohik gom, enjinj mikdok talitimenjinj tiinjinj heki’walaņ foloohik gom, enjinj me fafaņehi’walaņ foloohik gom, enjinj wosi,

en mikmehiye'walaŋ foloohik gom, tiŋa meeniŋ hogohogok, me bombonŋi en tipilapilaye, en lolonŋit, en fofonŋit, adi'walaŋ foloohik gom nadapmanaŋ.”

<sup>19</sup> Kaŋ nu Kale Moiniŋ adi kwetkwet diniŋ mapme hogohogok, en mikmehiye bopnedapmaune yabugut. Adi yadi me wosi fafau folon ikuk, ne en mikmeniye widihine bugiŋ. <sup>20</sup> Inŋon on, Kale Moiniŋ en adi'walaŋ polofet yalayalaŋ adi gweheye tugumuk. Polofet yalayalaŋ adigoŋ Kale Moiniŋ'walaŋ namanda folon kudi mebimebi tiŋila meeniŋ Kale Moiniŋ'walaŋ wou kamehatigiŋ, en weleweleniŋ mulelem timiŋgiŋ u wele tubufit tiyemguk. Kaŋ Kale Moiniŋ en polofet yalayalaŋ adi kaipmuŋ kayohik kohohik yehi-ibidokoon yobo moŋgo yakulune kalasindi imenŋwaŋ nabugoŋ kudup hadalakneŋ\* unŋon fogumuk. <sup>21</sup> Noli hogohogok adi yadi wosi fafau folon ikuk adi'walaŋ maŋiŋ ginaneŋ miknoŋ mikitdi labuŋa widihidapmaguk. Kaŋ bagi hekidi buŋa foloohik gom natoki hinek tigiŋ.

## 20

### *Sadaŋ yot fafaŋeniŋ gineŋ kameneen*

<sup>1</sup> Tiŋa kawe kunum gineniŋ aŋelo niŋ foguk. Adi yadi bom fuliŋmamaŋ diniŋ yeme youdilitom en tawa fafaŋeniŋ (sen) kakaŋ niŋ honeen ti buguk. <sup>2</sup> Tiŋa biyagoŋ kuyon,

---

\* **19:20:** Mede wondok adi Gilik mede gineŋ “Salfa kawade hakatdi imenŋwaŋ tiŋa kudup fafaŋeniŋ dalak” youkiŋ. Mede “Salfa” diniŋ mebi adi Diksineli pepa yendiniŋ fawineŋ unŋon kedem kawenŋ.

Fowa, miŋgembet komi, kadakaninŋ molom, wou Sadaŋ yoyam, adi honekufale tawa fafaŋeninŋdi ibikilitiŋa gulet 1 tausen ibikilitinit hahatdok niŋdapmaŋ <sup>3</sup> bom fuliŋmamaŋ gineŋ tobo tukulune foguk. Foune talik teheŋiŋa tubukilitihinakaanŋ nipmek fafaŋeninŋdi galiheguk. Unduŋ timimbune meeniŋ hogohogok weletubufit kotigoŋ mu tiyemiŋa hatilune gulet 1 tausen dapmaŋdok niŋgiŋ. U dapmaune tawa fafaŋeniŋ fiyakulimimbune labuŋa nai muniniŋ-kabe hatibaak.

*Meeniŋ nadisukilitihinit adi timenŋ pilatneenŋ*

<sup>4</sup> Tiŋa kawe mapme pop ituwat tubune mehinek mede yodapmaŋ titiŋdok saŋiniŋ yemuŋit adi pop wendok foloŋ ikiŋ. Ala adi Jesu medeŋiŋ yohautaniŋa Bepaŋ'walaŋ mede munta mu tiŋa hautaŋgoŋ kameŋ hatibune kodihik ulopmadigiŋ adi'walaŋ welehiŋk yabugut. Tiŋa Kale Moiniŋ nebe, be weleweleniŋ mulelem mu timiŋgiŋ, eŋ wou demehik foloŋ be kohohik foloŋ mu youkiŋ, adi'walaŋ welehiŋk maŋ yabugut. Meeniŋ uyadi foloohik maŋ kaikaune yabugut. Kaŋ adi Kilisto dut mapme kwanai tiŋa metam yabu-ulidoko kwanai tihatilune gulet 1 tausen dapmaguk. <sup>5</sup> Eŋ kumuhi noli hogohogok adi mu kaikagiŋ adi yadi gulet 1 tausen dapmaŋdok woom hakiŋ. Kaŋ pilapilat u kagut adi pilapilat kunakunat 1. <sup>6</sup> Ala pilapilat kunakunat 1 foloŋ youdihiiŋ adi yadi Bepaŋdi kahaŋ tiyembune welenadifo foloŋ ungoŋiŋ hatiŋ. Meeniŋ undihi yadi kumuŋ kunakunat 2-di yehitubu-silomut tibaak. Adi yadi Bepaŋ eŋ Kilisto'walaŋ Siloŋyot



diniņ talitimenį tiņa hatineenį. Unduņ tiņa adut mapme mintaanį metam yabu-ulidoko kwanai hati tulune gulet 1 tausen dapmawaak.

*Sadaņ adi yot fafaņeniņ biņa labuņa meeniņ wele tubufit kotigonį tiyembaak*

<sup>7</sup> Ala gulet 1 tausen dapmaune Sadaņ adi tawa fafaņeniņ u fiyakulimimbune yot fafaņeniņ gineniņ kotigonį labaak. <sup>8</sup> Labuņa kwetkwet fukuņ be fukuņ, wahiņkade be kumaņkade meeniņ hatitawiņ welehiķ tubufilaak. Gok diniņ bop eņ Magok diniņ bop yenintubulodaanį yeniņgigineune mikdok meyouť tiņa buneenį. Meeniņ buneenį adi’walaņ kunakunat adi imenįwanį wapum gagayenį kiņ itak wondok tuwolit, tuwot mu kunadapmandok. <sup>9</sup> Kaņ adi kwatnaņgoņ buge buge busuwaanį kwet gutuņ wapumnenį uņgoņ looņ meeniņ nadisukilitihiniť kweleyouhep tiyemiņa. Kweleyouhep tiyemiņa Bepaņdi yokwet momooņ kahileguk (Jelusalem) u maanį kelemadigiņ. Unduņ tulu kudup kunumneniņ fooņ yehidakumuņ-dapmaņ tuguk. <sup>10</sup> Eņ Sadaņ wele tubufit tiyem hatilak ne yadi kalasindi imenįwanį nabuņgoņ kudup hadalaknenį\* uņgoņ tobo tikulune foguk. Kale Moiniņ eņ polofet yalayalaņ adi wanaņ uņgoņ hatigumuk. Ala adut tomboyoula helebufa tuwot folofigita dapmandapmaņnit mokit, youdihiniť kisaņ hineķ hati-nadiyaneenį.

---

\* **20:10:** Mede wondok adi Gilik mede gineņ “Salfa kawade hakatdi imenįwanį tiņa kudup fafaņeniņ dalak” youkiņ. Mede “Salfa” diniņ mebi adi Diksineli pepa yendiniņ fawineņ uņgoņ kedem kawenį.

*Kougon mindan pilali kibikon mongtodok*

<sup>11</sup> Nu mapme pop wapum fafau nin kagut. Wendok folon ikuk adi'walañ namanda folon kwet kunum liwegumuk. <sup>12</sup> Kañ kumuñ tigin, lolonit be fofonit adi wanakan hogohogok mapme pop heben folon yalune yabugut. Adi ungon yalune pepa mohok tanakiyegin. Tiña nin tanakiyegin adi hatihati fafanenin dinin pepa. Kañ kumuhi adi yadi kaipmun hatinila titinhik tigin wendinin mede, pepa ginin youlinit u kanila medehik yodapmagin. <sup>13</sup> Kañ nai unaningon imengwan wapumdi adi'walañ maanen meenin kumuñ tigin unon hakin u yehitubu-udaneguk, en kumuñdi undugon meenin kumuhi yehitubu-udaneguk, en hamdi undugon meenin kumuhi yehitubu-udaneguk. Undun tubune kumuhi hogohogok adi hatihatihik dinin mebi yenintawan kibikon mede yenindapmanit. <sup>14-15</sup> Undun tiña kumuñ dut kumuhi'walañ kwet (ham yoyam) adi imengwan kudup ha-dalakneñ mongo yakulune fogumuk. Kañ metam hatihati fafanenin dinin pepa ginin wohiye mon yolohigin heki adi imengwan kudup ha-dalakneñ mongo yakulune fogin. Wendi kumuñ kunakunat 2 tilak.

## 21

*Kwetkunum kobuli mintawaak*

<sup>1</sup> Yon adi kunum kobuli en kwet kobuli yabugut wondinin mede. Ala indin, kunum komi en kwet komi adi yadi liwe tugumuk. En imengwan wapum adi maan liwe tuguk. <sup>2</sup> Kañ yokwet

ungoniņ, Jelusalem kobuli kuyon, kunum gineniņ Bepaņ'walaaniņ foune kagut. Wabihem niņ me dut yehikiutdok tinahukut tiyemiņ unduņ mohinek tutumbaañ tinahukulimiņiņ kagut. <sup>3</sup> Kaņ mapme pop ginenkade kutikuti wapum niņ indin buune nadigut, "Biyagon hinek kuyon, u kalan be. Bepaņ'walaņ yolikweli agaņ metam dut hatak. Ne lekiņgoņhik gineņ itoune metamdi adi'walaņ metamņiye tiņa itouneeņ. Bepaņ ne adut hatiņila <sup>4</sup> dautilitilikhik tumolokudapmawaak. Kumuņ be bulaniņgoņ be weyakawe be yagit folofigita uņon mu mintawaak. Biyagon kuyon, nemek komi hogohogok agaņ uņaniņ dapmawaak."

<sup>5</sup> Kaņ mapme pop foloņ ikukdi indin naniņguk, "Nadilaņbe, nu nemek hogohogok kobuli tubumintalat." Unduņ yoņa yoguk, "Mede yoņ adi biyagon eņ foloņ hinek ale youleņ."

<sup>6</sup> Tiņa adi indin naniņguk. "Agaņ tubudapmaņit. Nu yadi timen hatigut eņ mindaņ hati-baat, tububihit eņ tubudapmaņ. Nebek niņ adi imedok maņiņ galiwaak adi nu hatihati fafaņeniņ diniņ ime dawineņ gila tuwaņit mokit hogok mintoiwaat. <sup>7</sup> Nebek niņ adi fafaņe titawoņ tubudapmawaak adi yadi nemek i kahilewaak, kaņ na Bepaņniņ hatibe adi mihine hatibaak. <sup>8</sup> Ingoņ oņ, munta kelewodiņ eņ nadisukiliti mu tiņ, eņ kadakaniņ kaka tiņ eņ mik ulap, eņ meeniņ kefile mebimebi tiņ, eņ meeniņ upmuņ eņ tubuhi moņgo hatiņ, eņ kwet yabawen nadisukilitiņa bepaņ yalayaļ moņgo hatiņ, eņ yalaņ mede mebimebi moņgo hatiņ, meeniņ undihi hogohogok'walaņ yokwet adi kalasindi

imenḡwan nabuḡon kudup ha-dalakneḡ\* uḡon hatidok yodapmagut. Uyadi kumuḡ kunakunat 2-kuyon.”

*Jelusalem kobuli kunumneniḡ fowaak*

<sup>9</sup> Aḡelo 7 malinḡhik indigoḡ tuwot nemek miknit fotokiune moḡgo yaḡin, adi’walaaniḡ niḡdi nu’walaḡkade buḡa indin naniḡguk. “Buune Domba Mihiniḡ’walaḡ tamgigit ganimbe kawen.”

<sup>10</sup> Unduḡ nanimbune Uḡgoniḡ Munabulidi saḡiniḡnit hinek fotokinamuḡa nanagila kweboboe wapum kweheyeniḡ niḡ foloḡ looḡ yokwet uḡgoniḡ Jelusalem u kunum gineniḡ Bepaḡ’walaaniḡ, foune nanimbu kagut.

<sup>11</sup> Bepaḡ’walaḡ hauta holiholiḡneḡ wondi yokwet u hauta miḡguk. Yokwet wendiniḡ hauta adi kawade Saspa, tuwaniḡ wapum, walaniḡ hinek tiḡa filimpitpit tuguk.

<sup>12</sup> Tiḡa gimbaḡaḡ adi kawadedi foloniḡgoḡ hinek ibikelemadigiḡ. Gimbaḡaḡ wendiniḡ talifofonḡ adi 12, tiḡa talifofonḡ indigoḡ aḡelo kubuḡon kubuḡon foloniḡ ila uune kunakunathik 12 tuguk. Eḡ talifofonḡ indigoḡ tuwot Isilae metam bophik 12 adi’walaḡ wohik youliḡnit haliulak.

<sup>13</sup> Mele labulakneḡkade talifofonḡ 3, eḡ fukuḡniḡ kwet kumaḡkade talifofonḡ 3, eḡ fukuḡniḡ kwet wahiḡkade talifofonḡ 3, eḡ fukuḡniḡ mele folakneḡkade talifofonḡ 3.

<sup>14</sup> Gimbaḡaḡ wendiniḡ kawade daḡiniḡ hakiliti adi 12. Kaḡ kawade daḡiniḡ hakiliti 12 foloḡ

---

\* **21:8:** Mede wondok adi Gilik mede gineḡ “Salfa kawade hakatdi imenḡwan tiḡa kudup fafaḡeniḡ dalak” youḡin. Mede “Salfa” diniḡ mebi adi Diksineli pepa yendiniḡ fawineḡ uḡon kedem kawen.

lekingon Domba Mihinin'walaŋ aposel 12 adi'walaŋ wohiye youlinjit.

*Aŋelo ninđi Jelusalem kobuli tuwolitjin kamek-aguk*

<sup>15</sup> Kaŋ aŋelo mede naniŋguk adi kameka dinin kusek nin goldi tutumbagin honeeŋ yakuk. Wendi yokwet eŋ talifofon eŋ gimbaŋanjin kamekaguk. <sup>16</sup> Yokwet wendinin tunenjin 4, kolonjin be dabekjin tuwolit kubugon. Kaŋ aŋelodi yokwet u kelemadiŋa kusek kamekanjin kamekaune 2,200 kilomita tuguk. Kaŋ kolonjin eŋ dabekjin eŋ kweheyenin u tuwolit kubugon hogohogok tubudapmaguk. <sup>17</sup> Kaŋ gimbaŋan bateyenjindok tuwolit kamekaune 70 mita tuguk. Meeninđi kameka beŋa hatiyam undinjon aŋelodi honeeŋ hatiŋa yokwet kamek-aguk.

<sup>18</sup> Gimbaŋan uyadi kawade Saspa, walaŋin hinek, filimpitpitnit wendi tigin, eŋ yot heki adi gol, galas walahi diwetom tiyam undinjin tigin. <sup>19</sup> Gimbaŋan wondinin danjin hakiliti adi kawade mebimebi tuwahik lolonjit, adi'walaŋ wohik eŋ famahik hebet indin halifolak. Danjin kunakunat 1 Saspa uyadi giminin.† Danjin kunakunat 2 Sapaiya uyadi balimnit. Danjin kunakunat 3 adi Agate. Danjin kunakunat 4 adi Emelat. <sup>20</sup> Danjin kunakunat 5 Oniks uyadi fama mebimebinit. Danjin kunakunat 6 Kanelien uyadi giminin. Danjin kunakunat 7 Kilisolait

---

† **21:19:** Kawade wohiye hogok injon youkin eŋ famahik be namandahik yohebet Diksineli gineŋ yabeŋ. Adi pepa hapmun "Kawade momoon tuwanjin lolonjit hinek" unjon hakiin.

uyadi gwagwanit. Daniniñ kunakunat 8 Belil uyadi balimnit. Daniniñ kunakunat 9 Topats uyadi gwagwanit. Daniniñ kunakunat 10 Kilisopaluse uyadi kaikailen. Daniniñ kunakunat 11 Sasinti uyadi balimnit ingon hanindan. Daniniñ kunakunat 12 Ametis uyadi timbitimbit. Kawade undihidi gimbahan daniniñ hakiliti boina ibikelemadigin.

<sup>21</sup> Talifofon 12 uyadi fukut<sup>‡</sup> tuwahik loloñnit 12 wendi boigin. Talifofon nin fukut molomgon, talifofon nin fukut molomgon undun hogohogok yambiyakin. Yot talik adi gol waliniñ hinekdi kamegin, galas ginen diwedapman tine ulak undiniñ.

<sup>22</sup> Bepañ'walañ Silonyot adi yokwetneñ unon mu ilune kagut. Wapum Bepañ, Sañiniñ Molomdi Silonyot tiyemilak en Domba Mihiniñdi maan tiyemilak. <sup>23</sup> Tiña yokwet uyadi muyakipbe, be meledi hauta mu yemilak. Bepañne'walañ hauta holiholinedi hautayemilak en Domba Mihiniñdi hautaniñ tilak. <sup>24</sup> Meeniñ mohok yokwetkwet hatitauneñ adi yokwet wendigon hautayembaak. Kañ kwetkwet mapme hatiñ adi yadi bombonhik kedehi u mongola yokwet unon udapmaneeñ. <sup>25</sup> Yokwet uyadi mu bufawaak. Hadapmo hogok halaak doktiña gimbahan wondiniñ talifofon adi hamap hogok yatneñ. <sup>26</sup> En meeniñ

<sup>‡</sup> **21:21:** Fukut adi nemek kuyaniñ-kabe doktiña mede i nadiña undiniñ-kabe mu yona nadidok. Yon adi nemek undiniñdi wapum kakaan hinek. Ala wendi Bepañ'walañ yokwet diniñ talik yeme tijit. Fukut u dengon mongokiin? Uyadi imenrgan maaneñ foon kale wou kalamsel yoin u mongo labuña kufulahik tanakiyeen u yabuña mongokiin.

hogohogok adi'walaŋ bombon tuwanjŋ loloŋnit, nemek momohi, eŋ kobahi u yokwet uŋoŋ moŋgo udapmaneeŋ. <sup>27</sup> Eŋ nemek gengeŋnit adi uŋoŋ mu hinek fowaak. Be meeniŋ niŋ adi nemek mekaŋgoŋ eŋ madimadikeŋgoŋ tibaak be yalaŋ niŋ kame hatibaak adi maŋ yokwet uŋoŋ mu yalikawaak. Wohiye Domba Mihiniŋ'walaŋ hati-hati diniŋ pepa gineŋ youliŋit adi hogokdi yokwet u kahileneeŋ.

## 22

### *Bepaŋ'walaŋ hatihati ime eŋ hatihati bem*

<sup>1</sup> Anelodi ime wapum hatihatinit u titiŋenenambune kagut, woŋ adi waliniŋ hinek galas gineŋ diwedapmaŋ tiyam undiniŋ. Uyadi Bepaŋ eŋ Domba Mihiniŋ adi'walaŋ mapme pop mebineniŋ bulak. <sup>2</sup> Labuŋa yokwet wapum lekiŋgoŋ tali haliulak-tabe ulak. Kaŋ hatihati bem adi ime gagayeŋ fukufukuŋ yaliwiŋ. Bem wondiniŋ folooŋ adi muyakip 12 indigoŋ tuwot mintaaŋ gimindaŋ. Eŋ meeniŋ kwetkwet hatiŋ adi bem wendiniŋ hapmuŋ naaŋ kedebaneŋ. <sup>3</sup> Yokwet uŋoŋ adi nemek Bepaŋdi yobune hakinit tigiŋ hogohogok adi uŋoŋ mu hatneeŋ. Bepaŋ eŋ Domba Mihiniŋ'walaŋ mapme pop uŋgoŋ hinek itune metamŋiye adi tipilapilaye kwanai hati timineŋ. <sup>4</sup> Tiŋa undugoŋ adi'walaŋ folonamandapŋiŋ kaŋila hatineŋ, eŋ adi'walaŋ wou demehik foloŋ mintaaŋ halaak. <sup>5</sup> Yokwet uyadi bufa mu tibaak. Unduŋ doktiŋa kamaŋ be meledi diwehautadok mu yoneeŋ, Wapum Bepaŋ ne hautayembaak. Kaŋ adi mapme tiŋa

metam yabu-ulidoko kwanai helemahelman  
hati-tineen fafaenenj.

*Mede hogohogok i foloonj mintadok nai dulalak*

<sup>6</sup> Kanj anelodi indinj naniŋguk “Mede yonj  
adi foloonjnit enj biyagonj. Wapum Bepandj  
polofet heki Uŋgoninj Munabuli dahiyembune  
welehek tubutakalelak adi aneloninj niŋkulune  
tipilapilaye-meniye hidi nai munininj-kabe  
hatitalolune nemek mintadok yonjit u  
hanindidimeguk.”

<sup>7</sup> Jesudi yoguk, “Nadilanj be, nu aganj pilap bene  
tilat. Ala nebek ninj adi pepa yendininj maanenj  
kigili mede youlinjit, u didimeningonj kame hati-  
lak adi yadi Bepandj kahanj timimbune nadifo enj  
welemomoonj nadiluwaak.”

<sup>8</sup> Nu Jon, nukuyenj nemek i kanadi  
tubudapmagut. Kanadi tubudapmaanjanj anelo  
nemenemek nanimbihidapmaguk adi'walanjanj  
hebenjanj folonjanj foonjanj duwokeneenjanj niutumbawit  
yo tugut kanj naniŋguk, <sup>9</sup> “Undunjanj mu tibenjanj!  
Nu yadi tipilapilaye-me noke, enj polofet  
nokeye'walanjanj nohik, enj pepa yendininj mede  
gitagonjanj boihatineenjanj adi'walanjanj nohik. Du yadi  
Bepanjanj hogok nadiminja niutumbawenjanj.” <sup>10</sup> Undunjanj  
yonjanj indinj naniŋguk, “Du pepa yendininj kigili  
mede wobukufula tinjanj tubukiliti mu tibenjanj.  
Biyagonjanj hinek, mede yendi foloonjnit titinjanj  
nai aganj munininjanj hinek tilak. <sup>11</sup> Undunjanj doktinjanj  
neenjanj kadakaninj tihatilak adi kadakaninj undugonjanj  
hati-tuluwaak, enj welenjanj genjenjanjnit adi undugonjanj  
welenjanj genjenjanjnit hatiluwaak. Enj titinjanj didimeningonjanj  
tiinjanj adi yadi tomboyoula titinjanj didimeningonjanj taneenjanj.



En nebek nin adi Bepandi youtewalandagak undun nadiņa walanin hatilak kan walaningon hatiluwaak.”

*Jesu ne Jon mede ninguk*

<sup>12</sup> Nadilan be, nu agan pilap hinek bene tilat. Kibi tobonin nit bunça meenin hogohogok hatihati en titinhik dinin kibikon tuwolit didimeningon hinek yodapmawaat. <sup>13</sup> Nu yadi timeņ ha-tigut en mindan hatibaat, mebi en boki, tubu-bihit en tubudapman. <sup>14</sup> Dahidahihik youte-walandain adi Bepandi kahan tiyemulak dok-tinça nadiwe utumbalak. Biyagon hinek, adi yenimbe hatihati bem dinin foloon naneen tinça gimbahan wendinin talifofon ginen woon yok-wet maanen foneen. <sup>15</sup> Gimbahan maginen fakankade adi indihidi hatineen: kamo heki, up-mun sitnan en tubuhi boihatiin en meenin keffile tiin, en me udihikumun tiin, en kwet yabawen nadisukilitinça welewele tutumbaen bepan yalay-alan mongo hatiin en yalandok nadiune foloon tilak.

*Jesu ne yoguk, “Dewit’walaņ yalaki na inakon”*

<sup>16</sup> “Jesu, nagon aņelone ninkulene adibo kayonbopneye hidi na’walaņ mede hanihautagak. Biyagon hinek, nu yadi mundinin kobuli Mapme Dewit’walaņ yalaki ginenin mintagut tinça undugon nangat dikiņin hinek, tinça nu yadi helehele dinin bamholinça hautan hinek.”

<sup>17</sup> Munabuli en Jesu’walaņ tam gigitdi indin yoyamuk. “Du beņ!” Ala nebek nin adi mede i nadiņa undugon yobaak, “Du beņ!” Nebek nin

adi imedok manjij galiune kedem baak. Enj nebek niñ adi wendok nadikaan buña hatihati fafañeniñ diniñ ime tuwanjit mokit nawaak.

*Jondi Jesu'walañ yobihit mede yendok mute mede yoguk*

<sup>18</sup> Pepa yendiniñ maanen kigili mede youtat i kunatnadi tineen, hidi mute mede hanimbe nadinen. U indin hinek kuyon. Nebek niñ adi ne'walañ nadinadi niñ tubumintaan buña tomboyoolaak meeniñ uyadi Bepañdibo nemek miknit mintadok pepa yendok ginen youle hatak u tomboyoulimimbaak. <sup>19</sup> Enj nebek niñ adi kigili mede yendiniñ diki tubuflaak adi yadi Bepañdibo hatihati bem diniñ mede enj yokwet ungoniñ diniñ mede aditok gigit yonit inon hatak u lom mongolune nemu halimimbaak.

*Mede yokahan*

<sup>20</sup> Mede i yobihiliñit u kasop tilakdi indin yolak. “U Biyagon, nu pilap hinek bene tilat.”

U Biyagon, Wapum Jesu, du bubun hinek tiben.

<sup>21</sup> Wapum Jesu'walañ silon tobogondi metam hogohogok, hidut haliwoon halaak.

**Bepan'Walaŋ Folofolok Kobuli  
Genesis, Exodus, Psalms, and the New Testament in  
the Numanggang Language of Papua New Guinea  
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 21 Feb 2024 from source files dated 31 Aug 2023

217908e9-ce08-5ac3-9947-124c48579a74